

臞軒集



欽定四庫全書

臞軒集卷九

啓

按此卷自南外睦宗教授至通判漳  
州作後十一篇係代人作附卷末

謝真師薦舉啓



開藩旬日方羅幕府之羣英薦剡一封首及墻屏之下  
士識者以為公舉衆人則曰私恩退自省循獨有感慨  
惟師生以道而合與賓主之分不同彥明授業於伊川  
本無干祿之意噐之執經於涑水非為薦求之階天爵



重則人爵可輕義榮貴則勢榮可賤有寧終其身之弗  
遇不忍叛所學以苟容如某之愚從公也久孺子可教  
初拜南昌之贈言門人益親屢造西山而問道所謂晦  
斯明室斯通之席喜得於學不厭誨不倦之時昔年盛  
而氣盈今霜降而水涸來倚麟庠之席獲依燕寢之香  
瞬養息存日省月試窮理致用之訓朝以書紳習靜持  
敬之方夕而銘几苟有立命安身之地敢為貪榮希進  
之圖及牙燾之蒞三神山嘆蓬萊之隔一弱水忽聞郵

置特賜袞褒豈察其學業之漸成亦望其德業之少試  
盖知仲淹之賢則必薦遑及其他而為安定之學者非  
迂覲施諸用此相期之盛意不敢望於他人茲盖伏遇  
某官誠立而明通操約而施普鴻辭麗藻續麟筆之正  
傳寶匣瑤琴嗣龍門之遺響憂國之心愈渴閱士之眼  
彌高方將以此身任當世之經綸亦必勉其徒以大人  
之事業高文行遠而謂某有甚蔚之嗣章直氣蟠空而  
謂某有不阿之議論何以當此竊有請焉今天下之所

少非文士君子之最難者節居上位者既喜佞而惡戇  
在下寮者多毀方而為圓鄭公良臣不樂義方有太直  
之行曲江英宰且嫌挺之負苦勁之名所願先生秉鈞  
軸之權博取吾黨有氣節之士某益思植立愈勵操修  
表裏同源敢不推立言之誠而立德阿諛深耻又當移  
事師之忠以事君惟能為人是知已

謝曾參薦舉啓

起亞相於午橋行將入覲薦迂儒於寅陛轉以上聞趣

裝如其匆匆推轂胡為而汲汲仰窺盛意俯激愚忠  
竊以魏公用則所舉皆正直人司馬相則其徒行經濟  
學或拔才於選調或引類於經筵蓋畫錦堂嘯詠之時  
每訓才品而耆英會徜徉之際常訪人才况當聖主之  
勵精方召大臣於閑散必也搜羅俊傑使之馳騫事功  
如某者徒有苦心本無媚骨青衫素髮消磨十載之光  
陰黃卷短檠感慨千年之理亂但見與世而枘鑿不為  
隨人之桔槔來吟苜蓿之盤正在棘槐之里豈無蚍蜉



之援可以攀躋自顧麋鹿之羣其於恬退寧方為皂耻  
曲而侯不知何取於高明乃至垂情於寒畯豈必求乃  
予至有如程子之所規故敷奏以言猶愈知仲淹而不  
薦品題高而無實以稱力量大有而請必行茲蓋伏遇  
某官忠貫儀鄰名在彝鼎盛年勇退不依偃月之堂晚  
節益香好在靈光之殿上有意北方之經理公豈宜西  
墅之夷猶江左有管夷吾何憂得於親見齊國用樂正  
子為政誠所喜聞方將錄夾袋以儲才乃使先錐囊之  
露穎某誓堅素守圖報洪知馬有文章得預元祐科名  
之列尚存氣節要賡慶厯聖德之詩

賀福帥王侍郎啓

綴班法從出殿全閩淑旗綏章以錫諸侯申重帥垣之  
命精金古噐以比君子載頌御府之珍近比所無上意  
可卜惟七聚舊安於擊壤而累年釁起於揭竿屬郡五  
六城皆被瘡夷長樂十二邑僅逃鋒鏑震疊撼搖者方  
妥流離蕩析者未全電閃雷轟見謂驚魂之甫定風恬



雨霽要令元氣之復還爰以近臣付之顓閭觀聖天子  
臨軒而諏訪與明執事伏陛而敷陳田里根本則欲不  
傷臺府脉絡則求無壅言而及此民其庶幾恭惟某官  
一代宗師四朝壽雋故家喬木晉禊帖之猶存晚節黃  
花魯靈光之獨在容與功名之會更閱禮義之多自入  
李廷即躋栢府剛詞摘伏斥去熙寧之十鑽正色輸忠  
追還慶厯之三諫不為枉尺直尋而屈竟請高牙大纛  
而行至今嫠女之民昌言召父之政排抵權門之橫議

講明經界之良規孟子言大略於滕誰為潤色鼂錯嘗  
有心於漢令始施行此非俗吏之能為要皆儒效之已  
試綠綈亟召紫橐陞華勾稽版籍之盈虛甄別名流之  
清濁裕民足國鄙夷管晏之近功為官擇人度越馬裴  
之遴選將駸駸乎大用復汲汲於此來推廣王心王言  
發為仁轂仁聞念民疾苦如已痒疴解澆除苛遺安靖  
和平之福化頑歸厚示轉移風俗之機言之出於真誠  
讀者至於感激僉曰潁川去泰甚耳亦如渤海非求勝



之僕雖至愚竊有過計今之為民賊者多長惡之不悛  
上而苟有仁人盍知病之所在欲盡革帶牛之習當痛  
懲碩鼠之貪以致廣寇薄汀邵之鄰海盜闖漳泉之境  
淮卒橐弓之已散閩兵受甲而不勝彼易得以擣虛我  
豈容於缺備此不可以柔而獨理又當思先事而預防  
江左有管夷吾何憂幸而親見齊國使樂正子為政嗣  
此有聞伏念某樣不入時癖惟嗜古一第十七年之久  
歷官與四考之書校藝殿廷強項掇要官之怒充員宗  
邸低頭受公子之嘲人共嘆其淹回天乃錫之機會昔  
在丁丑嘗陪玉筍之門生今維甲辰復忝前茅之屬吏  
竦聞開府喜至忘餐適有采薪之憂遂稽拂繭之敬疾  
方少愈名始自通敢比正倫遙曹僭攀於杜曲擬同滉  
輩終身不叛於韓門

上何帥啓

征衣西上銜計臺一顧之恩別駕南來受帥閫十連之  
察涓剛辰而告吉飭柔訥以抒誠伏念某徒有苦心素



無媚骨校文紹定固應罹邪黨之讒奏疏端平何至取  
時賢之忌蓋以上方親政下無隱情雲狂因得以盡言  
黯慙遂從而妄發果而邊帥騰章辨跋扈之名重以廷  
臣切齒惡欺謾之語友朋解體嬖倖搖唇已方持一簣  
以障河彼乃推太山而壓卵坐以孔門訐為直之罪繩  
以漢法大不敬之刑小人謂弗免君子謂必歸未知死  
所聖主不加誅宰臣不見斥僅畀叢祠清遊亟返於蓬  
萊歸路載披於荆棘仙凡立隔榮悴頓殊失勢一落千

丈強自安蹇步衝人決起百餘尺坐看羣飛誓墓志堅  
買山計決曾謂成命自天而下循畀贅丞於漳之濱靜  
言思之孰主張是茲蓋伏遇某官德盛仁熟誠立明通  
更閱義理之多掀播芬芳之久正冠峩豸清風滌羣小  
之辱臺隨伏立螭直筆刊前朝之誣史庾亮之塵無所  
汙曹蜍之沫莫能加聖化更新前此緊官之餘幾分論  
不泯巋然一老之獨存已進登於獻納論思乃自詭於  
諮詢諏度屬時閩嶠有警潢池爰綴文石之班出當英



金定四庫全書  
卷九  
蕩之寄申嚴威令轟雷迅電之鋤姦加意撫摩膏雨祥  
雲之潤物驩騰七聚最徹九重爰以禮樂之使革更任  
詩書之元帥治貪墨則嚴三尺字惇發則寬一分議沮  
摧益無異毀征茶之詔稅寬履畝不啻爭青苗之難陰  
功碩德之居多野史稗官之可考惟是世途隘甚人物  
眇然此獨何時橫濟川之舟於野渡行且有命起擎天  
之柱於明堂固將登明而選公寧不憐窮而悼屈重念  
某猥以儒素來入吏塵名為分風月於偏州實似試湯

火之劇邑搜見底囊以供北餽作無麵餅以餉南軍押  
催科之帖而攢眉視筆楚之瘢而攬涕所恃惠慈之長  
少逋督責之嚴庶幾孤立危蹤毋至洊干司敗何相獎  
賢好士居多被薦於朝廷王祥佐郡無功安得具謠於  
邦國

西文錄上姚漕啓

綴班東觀嘗依太乙以分光半刺南州復仰福星而受  
察滌龜告至拂蘭通誠伏念某徒有苦心素無媚骨校



文紹定固應罹邪黨之讒奏疏端平何至取時賢之忌  
蓋以上方親政下無隱情雲狂因得以盡言黯慙遂從  
而妄發果而邊帥騰章辨跋扈之名重以廷臣切齒惡  
欺謾之語友朋解體嬖倖搖唇已方持一簣以障河彼  
乃推太山而壓卵坐以孔門訐為直之罪繩以漢法大  
不敬之刑小人謂弗免君子謂必歸未知死所聖主不  
加誅宰臣不見斥僅畀叢祠清游亟返於蓬萊歸路載  
披於荆棘仙凡立隔榮悴頓殊失勢一落千丈強自安

蹇步冲人決起百餘尺坐看羣飛誓墓志堅買山計決  
魯謂成命自天而下猶俾贅丞於漳之濱靜言思之孰  
主張是茲蓋伏遇某官德盛仁熟誠立明通續濂溪諸  
儒之燈傳延平夫子之印授徒講道七十子其速肖哉  
對策盡言二百年無此作矣自播倫魁之譽不萌榮進  
之心鴻冥冥而高飛犬狺狺而自吠及聖化載更於琴  
瑟舊染維新凡名流悉赴於弓旌同轂相應鐔津之龍  
始躍朝陽之鳳方鳴米廩橫經招館下諸生而受教蓬



山緡帙領瀛洲學士以登仙邁晉渥於郎闈仍陞華於  
樞掾試數偃月堂之黨富貴消磨何如靈光殿之存風  
標峭拔國論賴以訂正運籌仰其彌縫方佐鼎以調膈  
將持囊而簪筆屬時甌嶠有警潢池帝顧在廷孰任臺  
府相維之寄公於是地嘗播邦國不空之謠爰畀錫盾  
雕戈以鎮丹山碧水申嚴戒令轟雷迅電之鋤姦加意  
拊摩甘雨祥風之潤物七聚相慶一塵不警澄清激濁  
而吏治精嗟枯吹生而民氣樂惟是世途巖險善類彫  
零此獨何時橫濟川之舟於野渡行且大用進擊天之  
柱於明堂固將登明而選公寧不憐窮而掉屈重念某  
猥以儒素來入吏塵名為分風月於偏州寔似試湯火  
之劇邑搜見底囊以供北餽作無麵餅以餉南軍押催  
科之帖而攢眉視董楚之瘢而攬涕所恃惠慈之長少  
逋贖責之嚴庶幾孤立危蹤毋至游煩司貶世久無綈  
袍之誼下念故交僕敢憑杯酒之歡上千公法

通漳守鄭左司啓



綴班蓬觀稔聞尚書曳履之聲竊稍叢祠敢作刺史題  
輿之望偶叨恩而起閑散得帥屬以奉教條敬飭墨鄉  
晉干籤帥恭惟某官清凌冰柱峻埒斗杓昔在元樞不  
作漢唐之人物篤生令子克紹韓呂之世家方在盛年  
見稱偉器容與功名之會更閱理義之多正色立朝舌  
底吐冰人之語一麾出守毫端宣澤物之仁柰西風之  
塵一高而東山之興莫遏著書平屋講學專門卷之而  
懷已並復齊之高躅充然有得誠如西山之薦章及聖

化新琴瑟之調宜名勝應弓旌而起繇郎闈之雋武參  
樞掾之宏謨習明先朝之典章蕩滌累年之垢玩形之  
論建多所施行獻可有先見之明方為時出龜山又不  
合而去正坐名高賢者進退之非輕世道汗隆之所係  
比興思於側席亟有命以起家眷言清漳之名區宜有  
通儒之報政旄麾至止襦袴藹然崇尚文振起紫陽之  
墜緒蠲租減賦舉行作隱之寬條惟是時事日新善類  
星散朔黨洛黨之論橫起南軍北軍之變未銷此獨何



時橫濟川之舟于野渡行且有詔起擎天之柱於明堂  
某徒有苦心本無舛舌戇拙既不容於紹定踈狂復見  
斥於端平耕具釣竿已分煙霞之痼疾屏篋泥軼何心  
風月之平分獨幸以邑子而事鄉尊况復以書生而師  
素宦必有訂頑砭愚之教以為鍼膏起廢之方嘉與同  
寮欽奉循良之政令願言暇日拱聞經濟之緒餘

通興化范守啓

出綸閭闔作屏壺山范老十萬兵於胸中時方倚重元  
結數百輩在天下民其少甦仰上日之匪遙企下風而  
起敬共惟某官清凌冰柱峻埒斗杓月旦題評元方季  
方之行誼天庠模楷大陸小陸之文章講學徧諸老之  
參著書作千載之計屬權姦之當國紛競習之移人一  
世瀾趨相與染曹蜍之沫二難壁立斷不汙元規之塵  
紉蘭自馨食檠有味迨聖化已新調瑟而衆賢交起彈  
冠所挾者高尤難於進謂寧得小國寡民以行志不願  
為枉尋直尺以留中惟蒲稱詩書禮樂之邦久焉弄印



以公為忠信慈惠之長宜此分符旌麾未蕭前驅襦袴  
已歌來暮吏狃於政弱而垢玩民困於軍興之誅求剋  
肉醫瘡甚矣羣生之寡遂酣歌常舞幾於一國之若狂  
所望獨立使君之來以為一方疲甍之幸仁必有勇嚴  
以濟寬使鄉無打門索錢之胥則家有左饘右粥之樂  
然而世道隘甚人物眇然此獨何時橫濟川之舟於野  
渡行且有詔起擎天之柱於明堂某為儒而迂入仕而  
掘愚戇既見排於紹定疎狂復不合於端平竊祿祠庭  
已自分煙霞之疾贅丞鄰郡初何心風月之分惟半生  
於方冊以服膺乃一旦隸治封而親炙必有訂頑砭愚  
之誨以為鍼膏起廢之方嘉與斯民親沐循良之德化  
更祈暇日拱聞經濟之緒餘

龍溪趙宰啓

別駕權輕况復添蛇之足大冠寄重方興馴雉之謠佩  
高義之相先飭柔牋而起敬恭惟某官五玉明潤八窓  
玲瓏讀書感太乙之精光青藜杖琢句奪長庚之魄滿



古錦囊早斫桂以塞芳喜紉蘭而為佩花封小試尚餘  
壺山壽水之春蓉幕清游不受石門貪泉之污鶚飛薦

牘蟬蛻選階不能直尋枉尺以留中自詭墨綬銅章而

補外今之君子攢眉湯鑊之焦熬籍甚宗英入手霜劓

之敏決

一作早以文章之一班施諸政事之三昧

在我者大而官無小其位雖卑而名則高維今  
銅章所涖之邦乃昔綵捧經行之地寒生冰  
旣不妨馬骨之臞卧治琴堂喚起瀉灘之夢警吏則嚴

之三尺字民則寬之一分居然茂卓魯之勲為一道最

行矣厠嚴徐之列立要路津其之迂疎世所姍笑故山

招隱方縑相鶴之經漳水贅丞偶玷誤蠅之筆幸有宗

英之聯事獲於太邑以庇身州縣一家當念貫通之脉

絡雲霄萬里相期久遠之功名

按本傳邁由漳州通判  
言時事削秩久之復通

判穎州淳祐初通判吉州旋知邵武軍應有往來諸啓  
永樂大典本俱闕

代通應經略啓

誦諸葛出師之表久起敬於油幢為毛義棒檄之游行

備員於齶局士莫重乎始進天固使之有依三薰蒙竿

牘之恭百拜獻旌旄之下恭惟某官出處之節皦如日



忠孝之心通乎天筆下無一點塵埃富大獲之風采曾  
中有百萬兵甲負小范之經綸惟中原久淪汚於兵燹  
而殘寇尚陸梁於疆場士狃於東南之懦習皆諱戰而  
喜和公熟於西北之事情謂有進而無退止楚囚之泣  
而作其氣焚石勒之幣而挫其鋒伏大節以臨邊馳一  
封而詣闕忠誠憤發可質列聖在天之靈大計堅凝將  
有兩河拓地之喜未逾旬而來四方之豪傑不終日而  
易萬人之衣裝捷凱載涂羣兇禡氣其如功高而人見  
忌名大而世莫容方弘愬協謀俱授晉公之節制及魚  
程反間遽收郭令之兵權浩然袖手以來歸識者拂膺  
而太息然公論常如日月一食何傷雖雅志已在煙霞  
欲留莫可帝思南嶠之最遠詔以元戎而啓行幡然以  
轟雷閃電之威歛而為陽春膏雨之惠坐閱黃灣之落  
木足助吟哦笑飲石門之貪泉不移清介鯨波恬靜龍  
戶騷呼兼理民將略之長皆平生學力之驗人望之在  
執事遠則張方平之登輔相近則蔣穎叔之任樞機留



衣鉢以相傳紀祈常而可待伏念某聞道最晚賦才甚  
涼弓冶承家期復青氈於再世草茅對策濫收黃甲之  
乙科教忠方勉於過庭遭難何堪於陟岵意造物乘除  
之有數使世緣歷涉之稍深謀養斗升七稔寒饑之所  
苦失身筦庫一官猥屑而亦甘不圖初筮之遭逢乃得  
大賢而師事惟是傳癖書癡之素習拙於笏畫鞭算之  
良籌誓當自拔於濁流不敢取尤於清議服鹽車垂兩  
耳姑強顏陪屬吏於此時鐫渚石紀萬年願執筆從先

生於異日

代賀贛守聶侍郎啓

帝以近臣牧於巨屏昌言諤諤不能枉尋直尺以留中  
晚節堂堂徑請大燾高牙而補外善類愛其高舉衆人  
謂之左遷竊謂寘身侍從之班跬步疑丞之地皇皇患  
失比比苟同焉得受聖主之深知而能為大臣之倚重  
乃不阿合惟知納忠方在先朝一疏首排於社鼠及逢  
新政丹心慨念於鼎龍憫士夫少難進易退之風嘆廟



堂之歛受敷施之量獨立敢言而無懼旁觀竊忌者居多謂與其枉道而留又孰若從吾所好見幾而作守千里則澤千里之民量力可行寬一分則為一分之賜識者交賀壯哉此行恭惟某官義氣嗟雲精忠貫日去國十年而復入愛君一念之常堅際會風雲論思日月諸大夫之唯而舍之諤介若無朋一齊人之傳而楚之咻確然自信西風之塵已動東山之興愈濃請一壑以來歸縱六丁而莫挽惟今漳潁比漢淮陽如公直臣直宋汲黯開藩閱歲載路興謠貪吏聞風或解印綬而先去姦民縮手爭賣刀劍而歸耕陰功隱德之甚多野史稗官之可紀惟是世途隘甚人物眇然此獨何時橫孤舟於野渡行且入覲植一柱於明堂某一自遠離兩更寒暑昔侍樽俎聆健論之風生及伏衡茅喜直聲之日出遠莫陪於賀屢條已見於班春恨無怒翼以奮飛姑托便鱗而問訊夢魂失險常屢過大江之西旌節匪遙當敬迓修門之外



代上察院啓

接武筍班取辱綈袍之眷陳情栢府輒明貝錦之讒物  
不平則必鳴道既直則宜見伏念某雖名族實屬寒儒  
費半生燈火之功僅收科甲脫萬死兵戈之下方出選  
坑急為菽水之謀遠赴松廳之戍至則綠林之為梗窘  
於油幕之寡謀乃命書生往當勅敵飛矢亂石如雨之  
注弱兵脆卒望風而奔羣心變詐之不常衆口咆哮而  
待噬重以兩軍之先覆誰不胆驚幸而七洞之生降出  
於口伐夫何幕府策勳之日肆開黠胥納賄之門以虛  
為實實為虛故殿反最最反殿此姑勿論抑有大寃適  
下邑之長官為計使之親黨不善製錦游蒙帥閫之大  
訶力使代庖兼出庾司之重命自揣不堪於共二固辭  
輒至於再三兩司迫之使前一臺為之不樂帥既仙去  
庾又召還岌岌孤蹤皇皇終日詭計屢從而下石斐言  
巧入以如簧欲加罪則無辭至踰時而向隙有府從事  
獲譴於漕讞刑使者適至是邦既為之緩頰以解圍彼



得以乘機而轉手謂取鼎於郤莫能掩已之瑕疵必假道於虞庶可欺人之耳目名為憲劾實出漕謀求中傷者無自而吹毛受轉託者姑從而射影初止為魚而設網鴻則見離不忍殺牛以釁鐘羊誠何罪一路士夫皆為切齒三尺童子亦知含冤欲自雪以無由今幸天之已定茲蓋伏遇某官章天奎壁鎮地嵩衡霜榦堂堂魏暮有祖之烈冰壺凜凜胡威肖父之清新天子居然噐之先皇帝留以遺我峻擢烏臺之長屢輸白簡之忠持

公道如持權衡愛善類如愛圭璧諫官明目張胆之氣竦動周行宰相登明選公之方權輿今日致令么麼敢累陶鈞重念某親老倚門家寒透骨橫遭誣讒天高高而莫聞求欲辯明世滔滔而安往質衣而詣京闕束帶而立門闌黃緣一日之知僥倖三生之遇朝無知己灰寒未易以復燃公不垂情河清豈容於再俟况簡牘可詳於本末而告詞曲示於矜憐倘蒙軫繆綫之知異有可湔洗之理有人民與社稷固所甘心安邊境立功名



亦其素願雖甚不敏安敢辱知  
代節推謝帥還職啓

效官弗謹莫逃貝錦之讒薄罰示懲隨許舊疆之復方  
嘆宦海風波之洶湧賴有使天日月之清明愧見乎顏  
感極而涕伏念某名為族屬實則書生過庭聞詩禮之  
緒餘從仕守命義之大戒坐曹贊畫深慙不稼而取禾  
被檄董輸敢憚折腰而為米適大帥開藩之始軫細民  
艱食之憂既咸蠲斛面以寬民力之一分又督責闕頭

以防吏奸之百出凡編戶皆合詞而鼓躍在末寮當極  
力以傳承其奈此邦素稱薄俗凡為學子半是假儒簸  
而揚前有糝糠欺公太甚穀不熟弗如莢稗久積何堪  
則為出納之有司可不隄防於始入以此歛怨宜其速  
尤至於黠胥有鼠雀之求衆卒爭鷄蟲之得是則監臨  
之有罪方將兢惕以省愆敢謂仁私遽加恕宥初亦察  
祠家之無對疑且從輕終又喜小子之自新不為已甚  
茲蓋伏遇某官名節霜明而雪白德量山負而海涵一



飯念民推赤心而起廢萬間庇士赦小過而舉賢致使  
斗筲之微才不為天地之棄物某敢不澡身浴德息劓  
補黥正已所以正人已佩書紳之訓使功不如使過幸  
無躍冶之嫌

代上廣帥留郎中啓

委巷食貧每作梅巖之夢窮途干祿漫為蒲澗之遊惟  
莆為泉壘之附庸而尉廨星臺之奔走庶幾似鄉人而  
見喜况復援介紹而至前伏惟某官鶴唳青田鳳鳴丹

穴經綸敏手五色石之補天爾雅清文萬斛泉之出地  
澹然無膏梁之習即之有璋璧之溫別駕展軫歌播海  
圻而功歸邦國巨藩剖竹令修庭戶而人樂湖山入由  
農扈以升華旋陟郎闈而增渥却要津而懶上歛怒翼  
以斜飛兩節觀風秋月印錢塘之水十連作屏慶雲橫  
禹穴之山雖去留出處之甚輕柰功名迫逐之不赦惟  
廣重地在天一方起公祥斯道之刑見上重遠人之意  
鼓十四城而下令肅若風行用三十屬而無冤何庸雪



洗乃放宸綽就俾闡旄誰言五嶺之皆炎我覺二天之  
獨有坐閱黃灣之落木足助吟哦笑飲石門之貪泉不  
移清介龍戶按堵鯨海恬波昔開元有宋廣平嘗去之  
而黃閣至元祐則蔣穎叔亦由是而紫樞行將名字之  
覆甌端是登庸之傳鉢伏念某木偶人計拙冰氏子地  
寒五舉省闈幾成畫虎一叨仕版殆甚木鷄瓜戍之期  
尚賒匏繫之謀甚左漆雕開斯之吾未信初筮何堪燭  
之武老矣無能為壯心空在百指累累之待哺二毛凜  
凜以逼人為饑所苦而來稍足亦甘於隱知公侯下士  
不辭三握髮三吐哺之勞如鯁生無竒猶望一垂手一  
轉足之力寒谷肯回於暖律枯楊可冀於生華雖抱關  
擊柝且不辭俾越俎代庖則為過所求易與巢林之鷦  
不過一枝安敢負知伏櫪之驥猶思千里

代見福帥啓

炷瓣香於畫戟之堂舊會窺豹展漫刺於碧油之幕今  
復登龍不辭三百里之行來喚二十年之夢然公負韓



范歐蘇之人望孰不歸依而僕無曹劉沈謝之時名恐難記省非當代善類先為之介則何物小子敢冒而前恭惟某官一代倫魁四朝壽雋任重道遠六鼇背上之擎山孤立無朋萬馬羣中而駐足曩巨奸之當軸紛儉黨以盈庭時以即潛力持國是對仗而斥宰相人盡危之請劍以斷佞臣事果濟矣戎豸而登騎省執筆而立螭坳謹論危言振起過江諸賢之弱忠肝義膽對越在天列聖之靈道大莫容名高見忌不能枉尺直尋而苟

合乃請高牙巨燾而有行賑青社之饑如救頭然息潢池之警靡容目瞬甚盛之舉不一能言之類皆知及西風之塵愈高而東山之興莫遏以直道去人言野渡之橫舟知晚節難自賦寒花於老圃未幾清議之明白旋躋從橐之光華新天地居然噐之先皇帝留以遺我蓋將處之凝丞近地之寄必先假以詩書元帥之權四方望霖雨之霑濡七聚私福星之臨照衆俊皆已在列一老行即還朝僕雖至愚竊有過計今之天下所憂蓋在於



本根譬之弱人其病毋求之媵理賢能雖集而莫為之  
宗主議論雖勝而未見之施行主少國疑名為慶厯元  
祐清名之始上壅下塞實有宣和大觀蒙蔽之憂近觀  
諸賢時出硬語犯逆鱗之龍者有矣斥守關之虎者誰  
歟久焉恐嘉橘之栽亦能成枳甚者悔芳蘭之佩甘化  
為茅方人物之眇然如執事者有幾想近在目睫而有  
召命必豎起脊梁以濟時艱

代上廣東楊漕啓

三鱣堂前弱冠預諸生之列五羊城下強顏隨屬吏之  
聯不自知末路之桑榆輒私叙恩門之桃李南北雖分  
於二地生成實均於一天恭惟某官玲瓏八竅瑰竒九  
鼎龜山誠學續伊洛二程之傳汝水家聲出靖恭諸楊  
之右負倫魁之偉望敷膺仕之休聲迨綴鶴序於端門  
耻向權豪而炙手正席西庠而講道整襟北面者盈門  
時皆爭據於要津公獨回旋於雋武把麾出守遺愛藹  
於丹荔之鄉澤笏造朝衆心期以紫荷之橐帝惟海嶠



地遠神臯韶州白葛交趾丹砂方物萃止蒲澗踈鐘黃  
灣落木仙隱依然爰屈當代之偉人來將一道之餉事  
轡方攬而吏奸影遁鞭不算而貨源日通納上霧下潦  
之俗於清涼辦輓粟飛芻之功於間暇右諸道之課奏  
行被璽褒左一相之席虛亟膺枋用伏念某天賦不腆地  
寒無媒方為雁鷺之謀頻迫啼號之累瓜戍未及匏繫  
何堪初既職弟子於韓門繼又隸編氓於漆壤眷眷三  
十年墻屏之舊渠渠千萬間厦屋之依今焉效一尉於  
塵埃何幸望崇臺之旌祭必俟官期之至方執役於弓  
刀殆恐我公之歸邈難親於函丈投機之會間不容髮  
露穎而脫輒欲效毛未知倒屣之餘猶記遺簪乎否倘  
阮眼之青可再雖潘鬢之白何慚鶴巢林而求一枝如  
許依栖之地驥伏櫪而志千里敢辭鞭策之勞願以餘  
生決之一諾

山曲蘇代謝俞漕啓

備數恩門之桃李剡墨未乾遣哦隣邑之槐松檄緘狎



至方將圖報而無所何又蒙施於不求愧濫顏間感纏  
心曲竊以丞之為職實裨一縣之綱維官有攝員蓋出  
除臺之指授一有折肱而去孰不染指其旁會謂八郡  
之屬而難其人乃以百僚之末而充是選如某者學校  
百戰權輿一官收糞鹽清苦之身入枳棘卑污之地簿  
書鞅掌幾絕簡編燈火青熒動縻歲月恐辜父兄師友  
之訓敢效稻梁雁鶩之謀詎意薦鶚書名過飾斗筭以  
當鍾呂乃竟點蠅誤筆俾越尸祝以代庖厨惟同溪偏  
父母之邦而二令分子男之寄松榆相望瓜李其嫌以  
使指遣之而姑來故士民望之而加敬鶩行平立惟知  
占紙尾而書駑力何堪乃重費廐下之秣豈以曾在韓  
門之列故得收寘狄籠之中茲蓋伏遇某官道載堪輿  
文工經緯隔弱水三千而獨步將徑躋於蓬萊併楚澤  
八九而平吞初何有於雲夢必貯之承明之廬而後快  
乃畀以英蕩於外而謂何雖岫雲之出無心而陽春之  
來有脚主盟善類着眼畸儒比時之御輜軒既揚清而



激濁他日之開黃閣必登明而選公致死孤身屢煩大  
造其敢不飾所未至行其所聞厲素節以飲堅冰矢丹  
心而如皎日可南也或可北也亦惟鞭策之從能華之  
必能實之終賴陶成之德

門人代謝陳憲招捕啓

警曹滿戎曾叨薦墨之榮贊府缺員又拜辟書之寵百  
尺樓許之攀附三品筆極其光華疇不謂逢凜所以報  
竊以在上位者貴舉賢而報國居下僚者必擇主以託

身曩時鉅公多入古靈先生之薦藁近世名士半出北  
山夫子之門墻惟奕代之儒宗有克家之風烈屬時多  
事兼司一道之兵刑雅志澄清坐閱八州之人物行臺  
開大幕府選吏如小朝廷謂將邑當兵戈之餘而二令  
分民社之寄鷓鴣之室多毀鴻鴈之居未安親民固係  
於長官振職尤資於邑佐非智不足以剴繁治劇非仁  
不足以醒暘澤枯曾謂小才得居其選伏念某朱愚昧  
道白朴持身韋教一經努力箕裘之學孟鄰三徙厚顏



紈袴之朝坐踰甲癸之十霜纔仕東南之一尉當三考  
垂書之日有四郊多壘之憂心馳驛道之鈴耳洗江城  
之柝風塵正動惟知瘦却於豺狼夜曉不交安得夢飛  
於鷓鴣方為山之虧篲幸近水之有臺姓名得上於剡  
章榮耀頓生於末路歲聿云暮將趨吏部以覓官道阻  
且長獨念小人之有母遲遲西上汲汲南歸敢圖振念  
於遺簪即俾充員於占筆察父哲兄之念子弟未必如  
斯門生故吏之遇主人云胡不喜一力成就三生結來  
茲蓋伏遇某官尊主庇民之盛心開物成務之多識方  
在壯歲已負遠圖夜雪貂裘慷慨辦太原之檄秋風鐵  
騎笑談却沙漠之兵由其更閱理義之多所以容與功  
名之會方聞有黃巾之為梗起公於縑墨以從戎碧油  
運整暇之籌不差尺寸繡斧兼平反之任益重威權貔  
貅鼓行狗鼠褫氣凱捷紛綸而載路壽祠突兀以連雲  
人物今正眇然事變有大此者強藩悍鎮反狀已萌達  
官要人束手無策必有閱禮習書之元師方成雅歌投



金定四庫全書  
卷九  
壺之雋功誰為王言得借君重天下安得數結已交口  
於南州軍中惟有一韓始寒心於西賊預蓄英豪而待  
用胡為鬼瑣之兼收某敢不自勉孱庸力圖報稱士於  
知己雖披荆棘以不辭余不負丞已對松槐而有誓

代上梅州王守啓

受屢莆水稔聞王別駕有邦國之功試吏程江親覩漢  
刺史播中和之頌南北雖分於兩地生成均出於二天  
三薰致竿牘之恭百拜獻旌麾之下恭惟某官才名江

左學問河汾塵外清規望之如神仙胷中雅志決不在  
溫飽錦心繡口文追滕閣之英鐵畫銀鈎筆肖蘭亭之  
妙摘髭而收上第策足而登華途試劇邑之絃歌幾見  
飛鳧之迅主計臺之畫諾翊成流馬之功自分風月之  
清輝盍轉星辰之潤步時惟此土地處偏方帝念遠氓  
墮瘴雨蠻煙之底公來出守覺春風和氣之還輻蓋一  
臨袴襦交賀凝冰霜於吏膽滲雨露於民肌雖渤海賴  
龔遂而安然朝廷知弱翁也久凝香安靜暫為百花渚



之清遊出綉承明行踵三槐亭之盛事伏念某賦分不  
腆讀書無成五舉省闈暗投明日一般燈火半上青雲  
自憐髀肉之復生衆笑頭顱之如許試花城之一尉僥  
倖終更糾蓮幙之六曹過逾始望適以繫囚之殞斃坐  
於前政之稽留水中之蟹何辜反移其怒蕉間之鹿俄  
失雖悔何追毀出求全災生無妄瘴來似墨但憂老病  
之交攻言巧如簧不料抵排之至此坐是妻僵而子仆  
淒然日暮以途窮往來見庾嶺之梅老淚欲滴夢寐遶  
故園之菊歸心如飛豈期佐下邑之子男乃獲事故邦  
之父母寒谷肯回於暖律枯楊或冀於生華鷓巢林而  
栖一枝喜有依投之地驥伏櫪而志千里敢辭鞭策之  
勞

代通舶使啓

翠節光華竦望宗英於霄漢青衫藍縷分甘倉氏之塵  
埃幾年引脰以仰高一旦澡身而受察敬憑子墨徃白  
帥籤恭惟某官紉芳蘭而自馨挺靈芝之獨秀追河間



於千載後得禮樂之盛心夢太白於三生前傳文章之  
正印既收魏科不輟燈火雖在素宦全似布韋為藍田  
哦竹之游清哉官况試河陽栽花之手籍甚風流此雖  
緒餘獨不俊偉繼嘗馮軾無端溪隻硯之歸終一擁轡  
覺賓水甘棠之滿得地小而亦可行志去天遠而隨即  
疇庸眷海舶之一司關水衡之大計惟帝遴選煩公一  
來廉平而吏民安焉鯨波不動忠信而蠻貊行矣琛貢  
交通合浦之珠既去復還石門之泉不易其介大而國  
用羸虛之制即此權輿次而版曹出納之權歸其掌握  
行有召命以重此臺伏念某聞道未深涉世尚淺讀書  
發憤期收再世之青氈射策決科濫竊一名於黃甲方  
習趨庭之訓遽罹陟岵之憂謀養斗升七稔饑寒之所  
苦強顏筦庫一官猥屑而亦甘惟不武之書生殊未嫻  
於吏事祇恐斗筲之器難迓冰鏡之前念老父曾忝交  
承夙有通家之好則賤子雖無介紹此為藉手之階倘  
以臭味之略同庶幾眄睐之稍異服鹽車而垂兩耳願



殫駑力之勞得廣廈之有萬間可遂歡顏之託

欽定四庫全書

臞軒集卷十

雜著

天基節獻聖德一頌六箴

臣邁言恭惟皇帝階下天姿英睿聖學光明仰紹列聖  
燕翼之謀躬受寧皇寶龜之遺不自神聖恪守謙恭翠  
幄親儒有日月就將之功端闡養性無聲色遊畋之嗜  
是以祀帝於郊而天祖下格饗祖於廟而百靈降歆猗



歟休哉中興之景運有開而丕大之偉績可俟也臣伏  
覩天基聖節近在王春朝野多娛和薰萬宇慈闈加膳  
喜氣排冬寅陛需班驩聲動地臣踈賤一介生長明時  
來自遐方仕於京幕官品卑下大闕窮隆莫從一奉漢  
宮萬年之觴竊欲自附唐臣千秋之錄以表野芹獻主  
之義以寫寸草報春之心蓋不止鋪張洪休藻繪景鑠  
而已也臣聞三極肇判人類泯彝天作君師以教以治  
羲農黃唐而後系姚更妣承殷接姬帝統王綱迭相修

舉崇天普地賴以平成降嬴迄劉僅足以撐拄宇宙支  
持歲月比方古先厥德弗類末祚陵夷帝用嗇於眷顧  
有唐崛起積累蔑然祖武孫謀眎漢尤劣延及五季乍  
仆乍興維時三靈儲休闕祉以俟有道於是我藝祖皇  
帝寶生焉聰明神武超軼百王叱咤指麾掃清八極神  
戈載戢天宇聿新五緯宣明八政順序垂二百載陽九  
乘之國步間關王途堙阨駐蹕江左已及百年敵勢就  
衰人心思漢於是天復以聰明神武之德從而錫皇帝



陛下焉蓋以其數推之藝祖皇帝造國號為大宋改元為建隆實在孟春之端五陛下渚虹星電之瑞允同其時夫彼一時也而聖人造此一時也而聖人生皇天勦相我國家三百年間啓聖之期若合符節要非一朝一夕之故藝祖皇帝在天之靈所以期望於陛下者為何如哉記禮者曰有大德者必得其位必得其祿必得其名必得其壽昔者藝祖皇帝所以得此於天者亦惟曰聿脩厥德終始如一而已然臣觀藝祖皇帝脩德之要其目則有六焉曰愛民以仁也事親以孝也臨政以勤也律身以儉也聽言以公也制事以斷也此六者是其得天下之根本也神墨靈式施於後王世世遵承其永享國陛下於羣臣百工稱觴上壽之時盍亦思夫藝祖皇帝肇自區夏之日不先不後神比天同則謹修六德以對越神天以中興帝業可不日新而新不新乎論道經邦之弼臣獻納思之法從經筵鴻碩臺閣名流豈無忠嘉上資啓沃何庸小吏躡貢狂言臣竇不佞每自惟念



忠臣歆畝猶知愛君臣既食陛下升斗之祿非在歆畝之比而古之箴規告上自效愚忠雖工瞽不擇焉臣用敢效齋夙戒凜雪精神撰成天基聖德一頌六箴跼蹐屏營俯伏百拜以投進於闕下庶幾涓埃或可為海嶽之助臣不任拳拳

天基聖德之頌

天生聖人為民物主維時孟春日在端五藝祖皇帝肇造區宇國號載新天鏞斯補子聖孫神祇綿慶譜甲子五閏乃眷南顧皇帝之生實符藝祖昔星聚奎今虹飲渚日協時同重規疊矩節紀天基和薰率普玉殿稱觥登降拜俯微臣作頌爵抃鰲舞繼獻六箴願繩祖武

愛民以仁之箴

仁首五常元包四德為天地心立生民極猗歟藝祖以仁基國鞘戟橐弧兼受南北蠲賦輕刑與民休息列聖纘休祖訓是式一絲一縷為民愛惜螻蟻不踐况用民力與物為春配天其澤三百餘年期過用歷皇帝之仁



天姿隱惻固圉安邊藏鋒斂當鎖念昨賑饑救溺恩厚  
德崇日培月植壽國萬年仁其命脉

事親以孝之箴

孝先百行德適明神天子孝德異於庶人猗歟藝祖立  
愛惟親嚴事昭憲惟恭惟夤飲食藥餌必劬其身列聖  
趾美有親有尊一飯微減憂懼晨昏乘輿將歸留戀宮  
門事戒從令義不奪恩繇上儀下美化厚倫皇帝之孝  
胚暉惟真日奉三朝膳眎八珍月嗣任音早正虞嬪養  
志為大阜俗康民儀刑四海孝其本根

臨政以勤之箴

夏姒勤邦寸陰必惜周文即功日昃不食於皇藝祖肇  
基王迹風雪夜艾寢不安席幸大臣第載謀載畫列聖  
思治焦勞如一平旦視朝至夕猶惕勤政有論百王準  
的危竿有踰萬世藥石觴戒孟銘几書杖刻逮我皇帝  
惜時愛日初登寶位首監無逸不事遊畋不惑聲色靡  
不有初終其鮮克皇帝懋哉自強不息



律身以儉之箴

堯處茅茨德化斯美舜造漆器諫者不已於皇藝祖節儉恭履內殿有簾純用蒲葦幣幕無文不尚罽綺列聖監成嗇於奉已檻去青氊寢用絕被弊幄不更澣衣不耻嬪御無華珠璣不視刻偽返淳措世於理逮我皇帝崇朴惡侈稼穡艱難具知田里服御膳羞過自涼菲奢從儉難儉入奢易皇帝念哉謹終如始

聽言以公之箴

公聽並觀是非昭晰以私滅公忠邪莫別藝祖初興求言如湯奏疏來上始恕而裂補稿復前天顏乃悅大哉聖心昭揭日月列聖似之戶庭宏濶內降封還私謁自絕叩環大呼不嫌太訐明明皇帝大度恢豁養智以恬韜明不伐直諫宜容邇言宜察公道一開下情斯達成遠儉人湯戒女謁公私之分治亂之決

制事以斷之箴

制事非難其難在斷正固屹然何事不幹藝祖初興深



慮長算懾伏強藩削平僭叛志意堅凝羣凝冰渙果哉  
聖諾天授神贊列聖似之有剛無愞干法者誅辭難者  
竄威令惟行誰敢狎玩明明皇帝淵衷獨見脩我政刑  
強我屏捍政無多門令無反汗河憂殘鄰何畏外患果  
斷興唐優游衰漢疑斷之間興衰之判

存心以公之箴

厚姻婭近小人尹氏所以不平於秉均開誠心布公道  
武侯所以獨優於王佐故曰本心日月利欲食之大道  
康莊偏見窒之敢信偏則枉直而惠奸喜怒偏則賞僨  
而刑濫惟公生明偏則生闇

吉祥九齋銘

履齋

培爾德基修爾禮防素履潔如無替於常優哉視以考

祥

謙齋

名譽之來有道所忌守謙之一有益之四不然何六爻



無凶辭不曰吉則曰利也

賁齋

莫歸匪山有玉斯貴莫泓匪淵有珠斯媚人而不學其何身之能賁

頤齋

內外交養動靜以時歸而求之無舍爾之靈龜

兌齋

二水交潤而樂生焉相得則樂惟人亦然吁盍相與浚

其泉源而達之川乎

益齋

石有火擊之則明礦有金淘之則精其求益于而躬毋

替斯銘

井齋

毋羸爾瓶毋短爾綆掘九仞而棄之吁其可忍也歟

晉齋

一塵足以揜鏡之明一翳足以損目之睛去過之不勇



何咎德之不明

鼎齋

衣之將敝必求更之德之不新而乃安之吁蓋亦先所重而後所輕乎

殖軒銘

殖乎德其久也斯獲殖乎學其成也罔覺惟孝惟友曰義與仁為吾殖之本根培之溉之務滋于厥身身忿外欲吝容驕色為吾殖之蝨賊夷之薙之毋害我稼穡行有餘力乃藝文園情農自安胡取禾三百廛晝斯宵斯真積力久厥報維何自今以始歲其有

筆銘

在平世則策功龜圖在亂世則效勞麟史今聖明時維君子使毋曲以枉民生毋諂以事權貴書諫紙則犯而不欺釐史冊則直而不諱設不遇時卷而懷之南山可移茂林之草不可為

欽定四庫全書



硯則必端之求友則不端之取甚至於外無潤身之容  
中無介石之守見此石君亦顏之厚

鏡銘

胷中正眸子瞭然則其覽汝也貌悅神閑胷中不正眸  
子眊焉則其覽汝也顏如渥丹是則汝為吾之畏友豈  
但正吾之衣冠

几銘

發憤忘食勞且不息嚮晦見汝我心以懌嗚呼使其夢  
見周公則將矢辭以責曰我昔待旦思施四事子何人  
斯怡然熟寐其何辭以對

跋陳君保作詰藏趙忠定公帖

右趙忠定與興國判官林井伯君帖凡二十七紙今藏  
於其壻陳君保作詰家某與君保仲凡袁州教授為丁  
丑同年因謁而得寓目焉如為其先君子求墓表於陳  
正獻公則以泉壤不朽之榮為無物可諭之感至孝也  
如帥蜀日謂三邊幸無事然心念所及不敢不竭是非



毀譽色色有之獨念上恩至厚當思補報不復敢為身  
謀至忠也如帥福州日遇旱則曰寧以一身受此泉苦  
遇火則曰誠無顏面可見百姓至仁也至於崇儒重道  
之盛心班班見於行玉字金間尤可敬仰招致晦翁累  
書及之必欲得正獻一諾而後屈晦翁一來其拳拳於  
晦翁若此艾軒以書弔興國則以情如骨肉義兼師友  
至有邦國殄瘁之嘆其拳拳於艾軒又如此興國時尚  
韋布公與之交如敵已遠其至三山則有何惜不見過  
之訝有一好文字欲得同觀之約前輩所謂公之求士  
急於士之求公者蓋於此見之嗚呼章縫未遇時望王  
公如天人惟恐其不見招招必往而興國君能為公不  
可致之客亦今世絕無而僅有者矣丁丑臆軒王某  
敬跋

溫叔擬進指揮今至都堂分溫叔既擬進又奏曰恐狂  
生愈肆怪悖若罪之則適成其名不如天覆海涵置之  
不問上然之文公得免或謂溫叔諫止忠定慙愍之力

居多則知二公同心協力責難於君歷兩朝如一日也慶元黨籍固多君子亦有粗能自立於一時後來失友落節如黃子由輩者多矣時惟忠定公與文公血誠至公忠貫日月修名矯節如玉無瑕覽其遺墨想其典刑千載之下凜凜如生當時蠅營狗苟如曹蜍李志輩使使人欲唾其面則吾曹盍知所擇矣君保弟兄深善予言遂再書以為跋寶慶丙戌十月臞軒王某敬書

漳倅到任告先聖文

其學古而迂身謀甚左一第廿年方書六考貴豈不欲耻非其道富不可求從吾所好聖謨洋洋惟知久蹈拜廟之辰敢以必告

告靈著王文

某聞王威名如日杲杲今拜祠庭不敢私禱時事多難天步未妥川陝淮襄方罹兵火內地雖善安豈可保惟臣憂邊寸心如擣王於此時宜相天兆不獨著其靈於閩南自當昭其烈於江左



告靈會妃文

某日於家庭虔奉香火此來佐州敢申私禱微臣憂國寸心如擣身其康強家可以保晚得一男方離襁褓子其承家父可以老富貴倘來耻非其道神之相之正直是好

漳州辭廟文

乙未秋閏奏對未央其未信而諫也仙訕其私憂過計也似狂俯不媿於此心仰不媿於彼蒼明不負於天子幽不負於寧皇惟是結怨乎邊帥撥怒乎廟堂交惡乎閹宦取讒乎妃媼反舟蓬島奉祠故鄉聖恩寬大俾倖於漳敢求言之有詔將獻忠於皂囊疏已成而未奏俄白簡之飛霜謂不當諂事真某而慕名勝交結洪魏而相誇張又不當詆二相之為牛李以今日而比有唐以此得罪分之所當歸處南山之下讀書養正之堂誓無片言以干時不作一書以入抗亦有神明質之在旁臨行告別寓誠辨香神之聽之縮他腸

六野堂賦

并序為林侶之作

野有二義焉自野人禮樂言之則質朴無文謂之野自同人於野言之則廣大無間謂之野要之皆古君子事也親友紫洋林君侶之博雅好脩榜其堂以六野以曰山曰郊曰田曰景曰興之野與人之野而六之自序其目余嘉其居今世而行古道為之賦以廣之

山色兮蒼蒼郊原兮茫茫田疇高下兮稻熟杭香景物周遭兮竒卉脩篁野興之來無極兮煙霞雲月相射而流光有美一人幅巾道服彈琴著書兮友五者以相羊榜其堂以六野兮意甚真而味長彼李愿之盤谷兮與子美之草堂吾欲鞭吾驂以從之兮耿千載其相望一日盤礴乎君子之六野兮宛與二子參翱翔荷屋兮葺房芟衣兮蕙纒晞髮兮朝陽濯纓兮滄浪時趨於文兮犧尊青黃君獨從野人之禮樂兮外被褐而珪璋人習於險兮羊腸太行君獨于野以同人兮心太虛而履康莊世翻雲而覆雨兮君獨為徐公之有常世倂矩而背



繩兮君獨為元子之惡圓而好方吾不意閱盆盎而見  
壘兮厭喧啾而聞鳳凰惟世道之否泰兮斯人人之行  
藏儻蒼生命未窮兮當宏此道於八荒迢頑刻偽兮追  
還乎樸素之鄉舍和飲醇兮蕩滌乎忌刻之場窮則以  
野善其身兮如養生者之珍稻梁達則以野抹斯世兮  
如大醫之治膏盲此野之為義其大兮吾所以樂為之  
平章

愛方亭賦

為鄭伯昌逢  
辰宗丞作

環閩州兮多竒山品方山兮為第一如玉筍兮列洞天  
如金匱兮出石室有美人兮愛山日流覽兮解碧結數  
檻兮為亭題愛方兮為額客見亭名恍然動色爰問主  
人於義胡得子昔立朝匪有言責匭奏囊封披寫忠赤  
唐突廟堂觚排宮戚持鑿納柶以水投石有圓而卿立  
乎君側嫉子之方肆為蜂螫子胡不削之以為圓猶有  
愛方之痼疾主人曰嘻請對以臆時有污隆道無伸屈  
出處何常以方為的猗歟大哉方之為物莊士端人靈

墨神式王咸舉之為救司隸之幡曼倩執之為止倖豎  
之戟朱雲仗之為斬佞臣之劍秀實出之為擊逆賊之  
笏今予此山真大竒特如幡開張如戟嚴真如劍橫陳  
如笏端植此吾取之以名堂不避乎人之吾嫉王子聞  
而狀之曰惟剛故方不可撓而為繞指之柔惟直故方  
不可屈而為枉尋之尺彼時人之好圓猶四肢之無骨  
議政兮模味道之稜作史兮曲魏收之筆獻張禹之耆  
兮神其欺握孔先之杖兮弱無力佞者依憑巧者鑽刺  
突梯兮如脂如韋反覆兮為鬼為蜮使其足斯堂而面斯  
山寧不甲其顏而芒其脊嗟我狂生久矣廢斥家雖無  
愛方之亭心已有愛方之癖流俗兮滔滔書空兮咄咄  
何當浮湘水兮問訊道鄉之臺過南都兮物色元城之  
壁抱此方兮終身瀕九殞兮不休亂曰守初節分非難  
全晚節兮良獨難堅萬仞兮壁立保孤標兮歲寒一生  
無愧兮方寸地千載流芳兮方冊問要使方山之愛主  
人兮亦如主人之愛方山



愛賢堂賦

為叔正甫作

矧軒一日倦於酬酢掃几焚香解衣盤礴乍爾欠伸誰  
歟剝琢闔扉而視倒屣而躍則吾叔正甫手携愛賢之  
篇謂得之於故橐誥堂之所以名則曰人皆愛珠玉我  
愛子孫賢之詩乃前修之樂所今從而賦吾堂非吾子而  
誰託矧軒作而言曰傳不云乎惟聖知聖惟賢知賢况  
知之而又愛之不賢者必不能然經不云乎人之有技  
好之若已他人之賢且好之况為吾之孫子今吾叔也  
世賦之不嗜生產之不營曰吾有書可讀兮足以藐南  
面之百城曰吾有子可教兮足以賤黃金之滿籩挾吾  
所有之二樂以居吾堂兮彼區區者曾足為吾之重輕  
若乃髹几兮畫淨銀缸兮夜熒課羣兒之吾伊咀六藝  
之精英大兒引喙而高吟兮如啖天之鶴小兒調舌而  
學誦兮如出谷之鶯吾傾耳聽之兮若不脛而造元圃  
不翼而翔蓬瀛抑余聞之人之有生其欲其逐逐食欲  
肥甘衣欲華縟暑標欲涼寒館欲燠至於愛子孫之賢



則又人之大欲然或鴉鷺兮鸛鷓或龍駒兮牛犢紛人  
品之參差雖造物者安得人人而饜屬則亦如彼何哉  
惟自求於多福故曰太上種德其次種木又其次種穀  
木僅十年之需穀纔一年之蓄惟德則享之而不窮酌  
之而不涸吾門舊有三槐其大如屋本之以孝友兮可  
以厚栽培澤之以詩書兮可以深灌沃不尋之以斧斤兮縱  
之以樵牧淮水之流兮未乾文正之芳兮可續如以吾  
之言為然則吾叔也異夫人之癡叔

蚊賦

暑風始至天宇將昏王蟲甫掛於明缺銀蟾突出於游  
雲有喧於室有哄於門謳如亂雅之俚曲噪於不整之  
潰軍睨而視之徐而聽之則藐乎小哉其為蚊也於戲  
尤物之生有從是繁大而猛者則豺狼狼兕貙獍麀麀  
小而黠者則蝮蛇蝱蝎螂蛆蠱螫彼惟肆惡於川陸兮  
避之則易汝獨入於堂與兮去之則難彼觸之而後毒  
人兮其罪猶可貸汝求人而中傷兮其情不可原吾嘗



觀詩人之傷讒至援蒼蠅而為此蠅惟聲之可憎汝又  
魚之利嘴吾欲改止棘之章獨以汝為讒夫之刺蓋自  
古之小人多不利於君子將聖兮蒙毀於叔孫大賢兮  
見沮於臧氏管蔡二叔兮流言於國之碩膚驪戚二姪  
兮欲搖乎君之冢嗣子椒之間行兮惡草可掩乎芳蘭  
歌奴之潛入兮白羽或移乎秋氣腹有劍兮伺人之可  
乘笑有刀兮襲人之不備蓋此曹生則為囂囂傲傲之  
人兮死則為緝緝翩翩之鬼炙手附熱故態兮故多出  
於炎天陰邪穢汚其舊染兮故每生於濕地或被人以  
痲瘡兮如長慶三楊之流或進身以纖巧兮如熙寧十  
鑽之類吠堯之犬兮同聲相呼食月之蟄兮同惡相比  
是何天宇之不肅清使汝得以陸梁跳躑而為崇也王  
子平曰嫉惡如仇展轉不寐我心百憂在床下者必焚  
之以艾火集幃中者必驅之以膏油欲吾心之屬屢聲  
汝族之虔劓或曰不然疾之已甚者亂之端犯而不校  
者德之盛靡昏不明靡亂不靖維其忍之秉心無兢東

方明矣乃時之定王子唯唯靜坐以聽

欽定四庫全書

臞軒集卷十一

墓誌銘

莆陽方梅叔墓誌銘

宋 王邁 撰

莆品丁之家方為著姓端人紳士層見疊出有位公卿  
立修名姱節于朝者任牧伯連帥揚仁風義槩于外方  
者餘挾一能一藝多奮拔于鄉于學于天子之庭故  
莆人有無方不成榜之謠獨梅叔君懷瑾握瑜足跡半



湖海及天無老眼命壓人頭偃蹇不得志賫恨下泉唐  
人所謂直教桂子落墳上生得一枝冤始消者非君之  
謂歟君少受知於叔祖少卿公銓仕衡陽日君以子弟  
為賓客自書札外未嘗毫髮預他事少卿去衡君以衡  
人士多執經授業于其門者不忍捨其師去相率哀金  
買宅一區以家之余庚辰辛巳入潭幕於衡為近一時  
臺府知俞公澂趙公善踐孫公得輿李公東皆持節與  
梅叔交爭館粲之余每欲公檄游石鼓與君淪泉煇若  
相叩擊不能得君亦欲至潭訪余而諸公之在衡者恐  
其為有力者奪去竟不與行壬午春余以憂歸聲問不  
相接者十有八年己亥夏有以衰經造吾門視其刺不  
知為何來使介者詰之知其為梅叔之子也亟出迎之  
坐定且泣且言曰柴不天先君家衡三十六年壬辰歸  
故里葺先廬為終焉計不幸戊戌之閏月下世矣葬且  
有日柴哀先志不就大懼歲月久且沉泯無取證於來  
世求夫子之文刻墓石以傳則先君為不朽矣於是系



其譜而銘之方氏自光之固始來十有四代祖金紫分  
庭範宰長樂治產于莆遂為莆人君大父有為父冲卿  
潛德弗耀母林氏君生而岐嶷家貧無書借於隣族一  
日數行俱下終身不遺忘長為諸公要人客所為文操  
筆立就世有業進士不習為外學至目之為屠龍無用  
之技亦有專攻詩詞駢儷而不屑作原夫輦語以是為  
童子雕虫壯夫耻之者惟梅叔兼其所長故自少至老  
挾耿耿者以游四方而歲得子弟束脩及青雲貴人餽  
遺以自肥其遜家衡日買姬妾數十人吹笙鼓琴歌舞  
以娛賓客感時撫物念家懷土酒酣作樂府付歌者清  
婉可愛暨返故居出所貯蓄市田園以供粢盛得眠中  
人之產且過之每語子槩曰吾辭家出游時無半菽之  
疇無卓錫之地今有田若干屋若干非有俸錄以置之  
田吾筆耕之田屋吾書中之屋也雖然吾豈為吾身及  
汝曹溫飽計哉吾少讀書有志當世謂得百里為之宰  
必求如卓安令魯中牟得千里為之牧必求如田仁會



元結輩今無能以尺寸及物豈吾志不如古人吾才不  
及今人耶是有命焉吾固安之矣力學成吾志汝曹勉  
之槩誦其言以告余為愀然嘆曰士所植立係其志所  
逢合係其時今竊科進身有貪婪苟賤者官日大流毒  
於民日深蒙金與屋數世不肖子孫用不盡乃使志士  
仁人以濟人利物為心不得施設萬一分使之賣文為  
活僅得數畝田數椽屋以麻壽其後嗣則自詭以為詩  
書之末效至於身不得行其志且以望其子若孫焉吁  
是可悲也已君諱應龍以字行於世晚以梅窻居士自  
命享年六十七娶吳繼趙先卒男一人即吾友槩也為  
吾族乙未特魁之姪婚孫四曰炳曰煥曰煒曰燧女二  
長適營道宰商景春次適進士陳伯順早世槩以己亥  
九月六日壬申領諸孫奉君柩葬於興化縣廣業里牛  
岡之竹峰昔君在衡日謁術者得卦兆有牛崗尋吉穴  
歸葬竹峰前之句今所葬之地之名與兆協豈天閔神  
藏以厚吉人他日將有興者歟銘曰族望兮堂堂聲名

兮泯泯走四方兮皇皇不貴不壽兮返故鄉從龜從筮  
兮歸吉藏不在其身在於其子孫兮吾為之責報於蒼  
蒼

祭文

祭林通甫先生墓文

嗚呼湖海之英如公者幾儒冠誤人公竟止此談經講  
道三傳蹄筌人謂先生為盧玉川具眼達觀齊一先死  
人謂先生為蒙莊子少而好游足跡四方人謂先生為  
焉子長古貌古心寄興幽雅人謂先生為孟東野酒酣  
行樂縱筆歌行人謂先生為石曼卿知壽不遐晚不納  
室人謂先生為神明逸其位甚卑而道道尊其身云亡  
而德則存我輩游從為日既久天喪斯文哲人不壽撫  
棺而慟一酌抒哀冤如可招盍歸乎來東山之藏故居  
之右君子終沒而不朽

祭海陽縣尉林礎齋先生文

先生之學涵古茹今先生之文曼玉鏘金三千餘年授



業青衿晚得一第僅償苦心初筮警曹上官刮眼來事  
可為仕途履坦人亦有言黃花香晚天假之齡如是其  
短嗚呼茫茫彼蒼于物有情亨者使泰枯者使榮獨於  
先生畱而羸前輩彫喪空餘典刑吾黨向來受教席下  
一奠柩前有淚盈把鄉先生亡祭之於社誰倡義風興  
起來者

祭親友林涇清叔文

嗚呼人誰不死子死於溺九月初旬余聞之於道塗未  
敢以為的也未兩日而言之者益譁徃徃以為實也余欲  
問訊於子家恐子之親驚且惕也又數日始知子家招  
魂於水濱余然後撫膺而痛泣也自是以來余食不能  
以下咽寢不能以終夕也一夕夢子卧床簣之間余有  
言而子默默也既覺則月照屋梁恍然如見子之顏色  
也嗚呼子其竟止於斯耶子於余為世姻而交情則金  
石也余初聚徒於龍池子之年纔二十一也朋友五十  
餘人子獨為吾門之巨擘也與余累年為文字游子之

業青衿晚得一第僅償苦心初筮警曹上官刮眼來事  
可為仕途履坦人亦有言黃花香晚天假之齡如是其  
短嗚呼茫茫彼蒼于物有情亨者使泰枯者使榮獨於  
先生嗇而羸前輩彫喪空餘典刑吾黨向來受教席下  
一奠柩前有淚盈把鄉先生亡祭之於社誰倡義風興  
起來者

祭親友林涇清叔文

嗚呼人誰不死子死於溺九月初旬余聞之於道塗未

敢以<sup>為</sup>的也未兩日而言之者益譁徃徃以為實也余欲  
問訊於子家恐子之親驚且惕也又數日始知子家招  
魂於水濱余然後撫膺而痛泣也自是以來余食不能  
以下咽寢不能以終夕也一夕夢子卧床簣之間余有  
言而子默默也既覺則月照屋梁恍然如見子之顏色  
也嗚呼子其竟止於斯耶子於余為世姻而交情則金  
石也余初聚徒於龍池子之年纔二十一也朋友五十  
餘人子獨<sup>為</sup>吾門之巨擘也與余累年為文字游子之



學日進於一日也余既登第於太常則冀子聯翩於桂籍也去秋不利於貢闈則冀子策勳於環壁也中夏俟捷音不至則冀子歸之亟也末夏得中都書謂子有厭厭之疾也初秋寄書於子勸子以肩輿而歸恐病後之無力也不謂子舍陸而川遽有風濤之厄也嗚呼文人才士之薄命如子者益不一也賈誼止於二十三而李賀則二十七也今子年三十一而死亦未足為子惜也獨以死而不得正所以不能不為子戚戚也然自古有如子之不韋者皆不容以致詰也屈原自瀕於汨羅而李白自投於采石也子豈二子之流故與之相從於水仙之室也嗚呼才者鬼神之所嫉也壽者造化之所畱也使子無如是之才則亦不為功名役也使子不因於功名之行則必亦令終於寢室也然自達道者觀之則又等生死於一夢付去來於一息也莊周之徒所以不有其身謂不免乎烏鳶螻蟻之所食也蓋一點英靈之氣凡所至皆可求其魂魄惟是可傷可念者子有雙親



望子之成名於捧檄也子有少妻望子之和鳴於琴瑟也子何忍使老者之虛其望使少者之喪其匹也余與朋友所期待於子者何如又何忍使數月間而幽明之永隔也一慟生芻之前雖禿干毫不足以寫悲傷之臆也嗚呼哀哉子每能飲其量如鯨今酌一盃子不能傾子其知此情耶其不知此情耶哀哉

祭陳復齋寺丞文

嗚呼萬類汙汙隨波俱沒金石精監劫火不滅復齋先生千年人物忠孝持身聖賢合轍嗟世家之無人多自頽其閎闊惟先生大正獻之家聲有呂范二公之風骨嘆道學之無傳幾不絕其如髮惟先生得文公之正宗探伊洛諸賢之理窟方壯歲之立朝抱嶙峋之直節丙子一疏之盡言縉紳相顧而吐舌殿多為之失威社鼠為之塞穴既出把於州麾視民瘼之如饑渴南康延平之政成幾萬生靈之全活廬阜避其孤高劔水遜其清潔逮寧考之上僊泣遺弓之清血誓墓之志一堅粟里



之歸始決蘭無人而自芳松到天而不屈蓋其語也非  
賣直以沽名其默也非甘心於囊括其出也真有救世  
之赤誠其處也豈但為保身之明哲根之以內心之昭  
融加之以學問之親切由本領之純全故功用之宏濶  
將宇宙之是扶何梁木之遽折豈蒼生之命果窮而期  
文之脉將絕然生榮而死哀且全歸而無缺有東閣之  
郎君可繼承於風烈有西山之美人垂銘於墓碣然則  
先生之所存於世者甚長豈比榮華富貴之消歇某  
也以里巷之諸生荷知憐於方拙坐明道之春風揖濂  
溪之霽月歸自長沙也先生為之書廉仁公勤之箴及  
官中都也先生贈之以捨生取義之說尚擬嗣歲之春長  
在樞衣之列何哲人之云亡攬悲腸之怕結寄尊一  
觥臨文哽噎嗚呼先生幽明永訣

諸門生祭真大參西山先生文

時朝士之為門人者十有七人天生先生為宗社計進  
退存亡關係斯世海內一詞期以經濟道之將行命有

所制窮理致用講學有宗時雨之教春風之容偽者獻  
誠慢者致恭人謂先生為程純公方寸不欺守道自信  
曰思無邪曰無不敬口無過言身無玷行人謂先生為  
焉文正純公位卑道立於獨人惜其亡天下無福文正  
登庸遠夷心服未久而薨都人巷哭先生之道遠紹於  
程立朝補外俊偉光明先生之位雖不及馬兒童走卒  
無不知者權姦見忌退處八年著書西山其樂怡然天  
日清明甫及聞政筋力未衰乃嬰病疾丐歸者屢僅畀  
內祠丙吉病愈上日望之中外門人孰不致禱夫何彼  
蒼遽奪此老述作萬卷珍重璫璣最晉意者衍義一書  
謂此書成死可無憾自今觀之殆成語識風濤洶涌思  
濟洪流巨楫一折淪胥是憂自有都堂凡幾輔弼如先  
生者不一秉筆易箒之際神氣溶溶曰予此心秋月當  
空騎鯨而仙先生何欠國病民瘼孰鍼孰砭諸生疇昔  
樂在樞趨忍於此日而奠生芻薄奠陳情有淚盈掬已  
矣先生百身莫贖



又

先生受清和之異稟集理義之大醇氣之塞乎天地者  
志為之帥行之通乎神明者敬為之源允出處之大節  
為措紳之所尊維先皇帝賞其忠勤將大用而未竟留  
以遺於後昆維明天子潛躍有聞亟召還於長沙趨入  
覲於紫宸陳綱常以扶世教之墜辯忠邪以燭時人之  
昏使其言之果行可再造乎乾坤其如月偃林甫之堂風  
起元規之塵虎守關而眈眈犬吠雪而狺狺先生乃  
傲視乎軒冕高蹈乎邱園謂不見之行事即斯文而策  
勲登堂而受業者誦誦之學士趨庭而問禮者繩繩之  
子孫窮百聖位育之道探千古理亂之原著大學之衍  
義何肩孟而跨荀曰如有用我者吾將獻之吾君天佑  
我宋端平改元權姦不誅而自斃羣憚鼠伏而免奔先  
生乃辭粵山之泉石整造闕之申轅溫公起於洛人謂  
之游龍行雨范公起於蜀人謂之鳴鳳出羣去二公百  
餘載人於先生亦云至則抱所著之一書侍翠幄而討

論動重瞳之注視啓玉齒之咨詢位文昌之清華司貢  
闈之選掄疲神考校廢寢忘飧夜得一士旦告蒼旻暨  
撤棘而造榜愆調理於寒溫下天使之拊問示睿眷之  
頻蕃就登延於政府欲旋畀之國均奈大類之有盡莫  
竟展乎經綸上咨惜以輟朝痛元老之不存敕季弟以  
護定加賻禮而異倫錫以易名之典慰其如在之魂曰  
委質立朝無如公之忠曰垂世立教無如公之文合二  
者以為謚播青史之遺芬嗚呼哀哉惟先生之用舍係  
吾道之泰屯惟先生之存亡關吾民之戚欣嗟弊壞之  
已極當汙俗之胥淪進賢而莫行其志去惡而不拔其  
根橘或化而為枳猶終得而拏薰神龍去而羣蚘肆威  
鳳逝而衆鳥喧顧巨楫之已折傷波流之汙汙嗚呼哀  
哉先生所居化熏甌閩頃羣盜之為梗悉去晉而奔秦  
慘輻車之東歸哭道周之縞巾焄蒿悽愴之戚家如喪  
於所親先生所治易地同仁泉民愛之尤深如何內之  
愛恂聞郵傳之訃告慟於祠者兼旬秋菊寒泉之薦歲



彌久而彌新昔傳仙峯之絕頂有士修道而煉真丹甫  
成而倏化為先生之前身僕嘗於暇日以有問先生荅  
以不語怪神但言其使江東之日夢班於紫微之垣又  
言天上之為神仙皆人間之孝子忠臣今即斯言而深  
省當去而為上界官府之星辰某也猥以狂斐久遊師  
門受知護愛誨語諄諄鑄我以轉砂之爐斲我以運風  
之斤為訂頑而斲愚為祛蔽而通堙曰英氣多和氣少  
者憤啓之訓曰一生短千載長者有味之言自師資之  
既往悵莫報乎大恩追遺教以佩服誓九殞而弗護比  
閏秋之奏對吐肝膽之輪囷內言欺君罔上之百辟外  
言飛揚跋扈之統軍近言宦寺有捷出之徑遠言濟邨  
有未雪之冤荷聖度之容納初不怒其逆鱗獨驕師之  
肆辯結讒夫之搖唇至班行之謫子亦助之而瀾翻果  
白簡之見及曾余舌之莫捫幸鶴山之夫子獨愛直而  
賞珍空船載乎明月滿袖惹乎香芸入南浦之迤邐睽  
西山之嶙峋思立門之夜雪念侍坐之陽春恍昨遊其

如夢灑涕泗之繽紛嗚呼哀哉共極堂高兮夜不晨招  
鶴亭深兮愁暮雲六經無師兮宇宙無人惟有珠林之  
麓兮長餘春木之芘生芻一束心香三重先生如生歆  
此一樽其必曰是為吾學而不吾叛者宜登拜於斯墳

祭趙東巖文

嗚呼東巖在閩南塘在浙皆工文章皆負氣節塘蘭方  
枯巖松又折以官職言有優有劣以名節言孰全孰缺  
與其致身於從班以逢君為容悅孰若全終身之令名  
無可恨之毫髮比天下士均惜二公之亡猶為東巖悲  
傷而痛切昔寶慶之權門紛邪朋之附熱公纔綴於班  
行遽抽身而勇決逮端平之初元來衆正之英轍諸公  
挽之而晉中公乃掉頭而不屑方其陟峨嵋而游錦城  
歷秦望而探禹穴襲浣花之芳塵臨蘭亭之遺帖及其  
道林嶽麓之徜徉石鼓洞庭之登涉紉纒乎沅芷湘蘭  
搜采乎顏碑柳碣以昌吾詩之精神以寫吾琴之幽絕  
不汙庾亮之纖塵不染曹蜍之點沫其宰安溪也人愛



之如魯恭其守惠陽也人歌之如元結董睢邱之宗盟  
屬船臺之兼攝視琛貨如涕洟為不清作玉雪加以真  
西山之高與夫李竹湖之潔三清萃於一時賢者之師  
而不屑者之垣持兩節於重湖撫遐萌如饑渴當狎至  
之羽書督洪流之戰筏不加賦以擾民竟如期而津發  
處急遽以恬閑轉震驚而妥帖允飲德而茹仁猶膏枯  
而醒喝果最課之上聞亟賜環而第闕公一笑而來歸  
曰宵征之宜歇散策乎荷屋葯房銜盃乎杉風蘿月心  
羨高舉之鸞鳳耳厭妖鳴之鸚鵡指箕尾之晝升愴長  
庚之夜滅嗚呼哀哉人物彫萎世途杌隉命代之儒爽  
邦之哲聚於本朝猶在目睫二三年來如風歸葉仍於  
斯時奪此人傑更生卒而宗國之憂孰分李晟亡而萬  
人之命誰活以位則不至公卿以年則不登耄耄獨留  
東巖之巍峩長並三山之岌岌某也晚門墻辱憐樸拙  
文席一違歲筥四閱忽計告之流傳增憂心之忡悒  
覽謫仙之詩而涕零撫中散之琴而聲咽埋王之墳向

山之埳向馬素車誼堂膏秩秋菊寒泉宜薦芳列先緘  
詞以抒情叙榮哀之本末冀精爽之來歆悵幽明之永  
訣

祭魏鶴山先生文

惟國家盛時之人才稟山川清淑之間氣文章則眉山  
之父子道學則伊川之昆季更南渡之百年邈微稱而  
誰嗣鶴山先生以英偉之姿抱遠大之器文追正始之  
音學探聖賢之秘權史當朝以儒為虧先生輩人不得  
行志當寶慶之初元抗綱常之宏議虎守關而怒號犬  
見日而羣吠斥忠質於渠陽快女婁之怨詈誼也當此  
賦鵬以悲鳴原也當此沉湘而憔悴先生處之泰然曰  
吾有命有義履畏境如康莊茹苦荼如甘薺獨盡力於  
斯文將垂光於來世於易則探賾鈎深於禮則訂訛證  
偽於詩則陶寫襟靈於字則平章篆隸凡筆端之遊嬉  
指理窟而超詣積八年之深功續程蘇之位置使一朝  
之大用當盡抒於經濟迨夫天斃權姦朝登儒揆初年



而西山自閩來次年而先生自蜀至洪將諸賢後先征  
彙遂使端平之初及見元祐之懿奈西山之一類如果  
日之西墜先生哭之盡哀人士聞之興喟未幾而將終  
於家又未幾而洪薨於位東門者一人凜靈光之標  
致以致地之重臣為督府之元帥何異乎嫉真卿而使  
之為說李之行惡彥國而使之為出疆之使未視師而  
賊膽寒將策勛而同列忌俄異論之橫生悵初心之莫  
遂蜀無家之可歸奉叢祠之若寄及帥閩之命放猶物  
情之少慰司封駁者何人犯清議而不媿使元身之猶  
存尚行道之可冀何殞星之告妖乃條然而蟬蛻嗚呼  
哀哉天生偉人閩係匪細出處則關民生之戚休存亡  
則係吾道之興廢宜錫之期願之年留以為宗社之衛  
至於姦臣弄權貪夫敗類宜凶於而身而家母得以為  
鬼為魅彼蒼者天胡然不惠惡者永年善者降厲望之  
周堪歿而孔光賜杖於建平之間元城瑩中卒而蔡京  
白首於靖康之際鐘鳴漏盡者冥行不休而元夫巨人



乃淪亡而相身嗚呼哀哉國步間闕民生彫弊京襄邱壚江淮鼎沸外有側目伺隙之愼壬內有搖舌肆讒之婦寺比何時而梁木摧比何景而蛟龍逝是殆晉人所謂秋高搖落之時使人眩然而出涕某晚登門墻辱窺小異雖名位之不侔偶襟期之胥契讀奏篇之瞽言曰差強乎人意屬霜簡之見排紛羣目之疾<sup>視</sup>先生白之榻前至色莊而言毅謂去一微臣不足憐恐天下自此以為諱施開悟於上心得免投之荒裔贈之以朝陽鳴鳳之繡圖申之以綵筆飛鸞之大字至今序引之珍藏熒然有光於巾笥先生於僕非納交僕於先生非借勢或者下石之未休猶謂托名流而附麗自漳濱而斥還擬墓前而自誓抱直道以不渝鞭古心而愈勵聞訃告於郵傳集百憂於肝肺蓋為道之隱憂非特一身之私計假精廬以招魂陳生芻而設祭諒英爽之周遊如源泉之在地隨感召而必通儻下歆乎一酌人之云亡邦國珍瘁悠悠我思明發不昧



祭丁元輝給事文

嗚呼人之才品有崇有庳遭時履運有險有夷自寶慶而紹定紛邪黨之猖披毀蘭茝而不佩采蕭艾以充幃公乃在下寮而不愠見合光鹿而不詭隨此一時也人不得以汙元規之塵而見譏暨端平之改瑟為善類之休期鳳鳴陽而噦噦麟瑞世而師師公乃居風憲之緊地進伏蒲之良規此一時也人不得以負望之之薦而見疑至嘉熙之變局正黨論之交馳摸床啓者無可無否騎門限者半黠半癡公乃吮筆乎螭陛演綸乎鰲扉司銀臺之封駁班文石之論思此一時也人又不得以牛李之黨而目之嗚呼自紹定而始進已發軔乎通達在端平則合端平在嘉熙則合嘉熙自古賢者之出處不與時柄鑿者幾希設於時而諧合又於道而支離公則內不失乎已外不違乎時出與物接侃侃愉怡入守官箴惴惴矜持享享祿而弗恤諸孫之無褐典衡文而不欲邑子之瞻依於所厚者寧薄不以公而戚私入仕



四十年而不掛吏議立朝十餘載而不蹈危機上有以  
結九重之眷下有以締三相之知將進登於四近庶展  
究其設施方其後福之猶熾胡造物者之不憇遺嗚呼  
年來人物日覺彫萎有出處不能為朝廷之輕重有存  
亡不繫世道之安危有毀譽出於勢利之遷就有是非  
不根於人心之秉彜如公之不大用亦門生故吏之所  
共悲僕昔同朝纔及半暮以罪去國升潛異岐聞訃告  
而感悼迎素車而差池生芻一束寓哀平時嗚呼公乎  
竟止於斯

祭鄭都承子敬文丁酉

嗚呼哀哉仲春初溼方得公書情文溢紙細字渠渠謂  
因感冷藥裹是需我每羨公精於調理紅顏怡怡高談  
疊膏縱有微疴亦偶然爾一日行路忽有異傳我不敢  
信心極懸懸徐詰其實公果溘然嗚呼哀哉公生相門  
實則儒素淫茹羣書練習典故不但多聞且通世務太  
和試邑藹有休稱入遷院轉為承顯宦要職跬步可



登維時權姦其門可炙公心恥之抗章丐出吾宮寧  
卑吾道不屈高牙大纛作牧廬陵民饑春暖吏膽冰疑  
不畏強禦讒言朋興浩然來歸一邱一壑與陳復齋追  
隨最樂岡俾耆英專美於洛十有七載承山乃傾遙以  
郎台承旨樞庭一語不合拂袖而行有詔起家畀以漳  
守政活民疢是圖是究千里詠歌二天宏覆迺者望日  
出勸農耕歸坐鈴閣寢已三更曾謂頃刻乃隔死生嗚  
呼哀哉賢者存亡有關天運比年以來德星屢殞我欲  
問天天不可問復齋冢木鬱乎蒼烟建昌仙去閭里淒  
然又弱一個人何望焉嗚呼官至元士官不為小年踰  
耳順年不為天所可恨者積豐施眇郡失良牧朝失蓋  
臣子失名父里失賢人知與不知愴然傷神某也辱知  
亶非一日迎拜素車有淚盈臆卮酒寫哀公其來格嗚  
呼哀哉

又

嗚呼嘉定之間朝登謬宰公閑於家十有六載端平儒

相收召諸賢公得起廢一歲數遷是時朝廷號小元佑  
公在都司賢業未究三陽方長羣陰伏陣脚一動公去  
翩然出守清漳未幾奏最胡為元身中宵蟬蛻年來  
宇宙白晝晦冥天荒地老雨怪風盲元夫鉅人乃不得  
壽俗物茫茫龐眉首靖康之際海內流離龜山和靖皆  
身見之孰若元城與了翁老騎鯨而仙不見此禍公  
今往矣鈞天其游千年芳魄聊寄此邱子孫能賢滿種  
松檟吉人之藏過者下馬

祭連袂謝克恭欽仲文

嗚呼人道亦大矣或托好於朋友或締契於姻婭始情  
分之雖密終交道之難全間有全之於其人而固虧之  
於其天此吾今日所以為欽仲而一慟蓋不勝其愴然  
也始吾與欽仲為友道同氣合者垂二十年散則無一  
月而不遣僕聚則無一日而不共筵我嘗砭君之過君  
亦繩我之愆允書素之所寄皆中心之所宣如淵明親  
戚情話之悅如子美人生襟袂之連及余自長沙而告



至君嘗唁我於堊室之偏秉燭相對而夢心事未剖而  
遽施自後僮仆之往來乃言偶困於沉綿然以宿疴  
之屢愈將謂後恙之必痊亦豈料賈誼之速化而長吉  
之遽仙也哉嗚呼欽仲已矣在閨門則孝友而無間在  
媵族則遜義而相先何厄運之推移使門戶之迺遭既  
啣悲於此姑又抱痛於斷絃獨其身之僅存俄夜壑之  
移船此道路之人皆傷吉人之不壽不獨予涕泗之漣  
漣所可幸者君有子已近志學之歲君有弟可謂克家  
之賢若夫受嵇子托孤之寄念翟公書門之言余不敢  
以不勉君可瞑目於九泉嗚呼昔我至止倒屣出延今  
我來思忍相弃捐隻雞斗酒酌君柩前嗚呼哀哉逝者  
如川

祭海豐宰顏養智文

疇昔之日辱君文盟芝蘭臭味金石交情君來吾莆大  
揚教鐸我時過從論文甚樂君自莆歸得宰惠陽懷此  
美人在天一方物色便郵將寄雙鯉有自南來曰君止



此嗚呼清源勝彥壁水名流穹車方駕誰折其輻海內  
年來善類彫瘁公亦無年歿於下位有子尚幼未能扶  
喪賴有玉季扶携還鄉卅旒載道見者墮淚薄酒一卮  
朋友之誼

祭從兄鸞少冲文

嗚呼能不能謂之才幸不幸謂之命世有妄男子而僥  
倖成名亦有老文學而終身蹭蹬此志士所以多苦心  
必蓋棺而後事始定吾兄少年席珍待聘有聲譽之交  
馳屬春秋之鼎盛夫何抱璞而啣卞和之冤鼓琴而無  
子期之聽澤水涸而蛟龍愁暮天寒而麒麟病晚始豁  
然而達觀蓋未始不順受其正某幼辱兄憐長知兄敬  
每旅試於文場惟元方乎審訂我及壯而策名兄晚節  
而尤勁將收功於桑榆何舟移乎宿信告殮斯辰痛根  
天性卮酒陳哀誰知此疾

祭鄒給事母葉夫人文

昔者曾子子路初仕之時俱有遺祿逮親之喜及夫親



此嗚呼清源勝彥壁水名流穹車方駕誰折其輶海內  
年來善類彫瘁公亦無年歿於下位有子尚幼未能扶  
喪賴有玉季扶携還鄉卅旒載道見者墮淚薄酒一卮  
朋友之誼

祭從兄鸞少冲文

嗚呼能不能謂之才幸不幸謂之命世有妄男子而僥  
倖成名亦有老文學而終身蹭蹬此志士所以多苦心  
必蓋棺而後事始定吾兄少年席珍待聘有聲譽之交  
馳屬春秋之鼎盛夫何抱璞而啣卞和之冤鼓琴而無  
子期之聽澤水涸而蛟龍愁暮天寒而麒麟病晚始豁  
然而達觀蓋未始不順受其正某幼辱兄憐長知兄敬  
每旅試於文場惟元方乎審訂我及壯而策名兄晚節  
而尤勁將收功於桑榆何舟移乎宿信告殮斯辰痛根  
天性卮酒陳哀誰知此疾

祭鄒給事母葉夫人文

昔者曾子子路初仕之時俱有遺祿逮親之喜及夫親

沒之後方為楚國之仕參則謂椎牛之祭不如及親之  
雞豚由則謂列鼎而食不如為親之負米是則為二子  
之親不能不遺憾於此孰如夫人克生令子垂三十年  
優游甘旨奉楚堂之養則坐享重茵開魯侯之燕則誕  
膺多祉凡參也由也其親之所無者夫人皆得而有之  
矣惜夫萱草之春未央白楊之風遽起胡不及見列辟  
之回班而乃遽罹憂於陟屺僕也昨筮仕於蓮池荷元  
戎之知己及銜恤之來歸每懷思於湘水聞夫人之訃  
告增寸腸之哀毀悵望素帷莫能至止寄情斯文有淚  
盈紙

宜春郡博士陳茂獻哀辭

天之生賢兮孔艱既曰生之兮曷不其延豐之才而嗇  
之數兮意乘除之或然吾非為茂獻惜一死兮蓋為世  
惜一賢木堪棟於明堂兮俄漂搖於風雨玉可藻於清  
廟兮遽委棄於泥土不曰有命在天兮杳乎不明其故  
豈物之生而有才兮皆鬼神之所妬充茂獻之純孝兮



可移為忠以事君雖欲為而不可兮猶可證於方冊之  
遺文施茂獻之友悌兮可熏善良於國人雖施者之不  
遐兮猶可挹其紫荆之餘芬嗟人之達道兮豈不知順  
受其正獨我輩之情鐘兮有不能以自勝命短而所存  
之甚長兮吾於君乎何病尚其相爾弟昆暨後嗣兮天  
至斯而始定

欽定四庫全書

臞軒集卷十二

宋 王邁 撰

古詩

試石鼓墨得月字韻

水聲響瑤淙山勢高崑砢我居山水間瞥焉五閱月看  
山寬眼界聽水清詩骨妙理在濁醪淡交寄薇蕨翻書  
明月軒淪茗清泉窟一雨釀黃梅連朝來不歇雲踈漏  
簷光晴意猶鶻突卓午睡曹騰起來足不襪搔首獨無

言書空時咄咄天字未清和世途良艱孰丈夫志未酬  
徒有衝冠髮俛頭習科舉與俗聊汨汨壯圖要有待非  
以黔吾突富貴漸逼人榮途輒須發

題元山蔡行可對青亭

終日在山中不見山可愛欲識愛山趣須在山之外南  
山不古今悠然與意會西山無朝暮佳致固長在蔡君  
金玉人結亭避闐闐面面蒼壁屏坐卧與青對晚曦射  
紫翠宿雨濯藍黛能消幾兩屐不賞此奇槩芙蓉為君  
裳蘭茝為君佩今非避世時乃學陶謝輩諸公富唱酬  
拔戟各成隊我出一轉語功成身始退君為端明胄忠  
孝後必大山靈縱有盟一出合破戒蒼生正有求富貴  
不渠貸山債會一償相期在晚歲

題弟綱舉之奉仙之室曰小蓬萊

吾祖有方平曾與麻姑會滄溟化為田彈指五百歲又  
有仙人喬神游八極外朝舄作鳧飛世緣比蟬蛻寥寥  
千載後之子得正派風度亦可人春秋况未艾朝搬紫



河車暮結飛霞佩嚴事鍾與呂信心終不退經營白玉  
壇肖象儼相對四面來青山獻竒飛羽蓋爐熏徹玉虛  
劍水清塵界瓊笈閱千函丹方探三昧誰謂三島遙近  
在吾境內蓬萊若云小孰能為之大

跋黃京甫必昌提幹四書講義

吾友黃京甫器資厚以渾自了場屋債徧參諸老門四  
書不釋手日旰忘晨殫超悟到聖處不能忘于言序講  
凡五篇字字比璵璠伊洛有心印傳受百聖源紫陽有  
心燈矚破萬世昏得君再紬繹提要鉤其元如印一洗  
滌篆籀宛然存如燈增膏油光焰大且繁我昔從師友  
是書粗討論老大學不進德性焉能尊因君重感慨舊  
聞日當溫願言剪枝葉作意事本根

甲戌九月日有食之紀異三十韻

甲戌九月秋朔旦見災青孛孛犯大陽淒淒如月冷方  
其始虧時宛然蟲食四食之至於既當空懸黑餅髣髴  
存輪圈中陷猶枯井雲間星晝見草木森弄影天地寂

無聲疑似非入境問之道旁翁欲語喉先哽翁今九十  
餘眼未見此景爰有蟣虱臣拜跪淚沾領天高聽則卑  
宜鑒愚臣請日者陽之宗千古光常炳此日何不減臣  
心憂耿耿或者天愛君先事示之警流金為湯戒洛水  
為堯傲雖重一時憂何傷天歷永吾君今堯湯四海元  
元幸公道大開明朝列肅而整祇恐萬一間左右容愼  
偉方秋陰用事陽微陰漸逞不去讒慝根懼作忠良穿  
天乃出怪異意欲悟觀省吾國必有人伏蒲輸骨鯁吾  
君必開納小心知畏謹陽政必日修陰邪必痛屏天其  
終仁愛悔過在俄頃大叫天上人齊喚金烏醒

讀林去華居厚主簿省題

病夫夜不眠五鼓始交睫懶起比吳蠶情夢飛莊蝶恭  
承高軒過不及倒屣接惠我百篇詩珠璣何熒燿五言  
比長城一望皆危堞壯如廣陵散悲似陽關疊音韻最  
清圓格律尤妥帖登壇禪將降呪水小巫怯永嘉富人  
物徃躅足追躡經術止齋陳文章水心葉林君游其門



早負賢闕籓鄉校設臯比戶外紛屨彙科目苦無憑取  
捨如漁獵入網多弱翰上鈎希巨鬣西廊上奏篇甲第  
僅書捷低頭矮屋中壯氣不萎蕭研朱點周易修此清  
淨業焚香讀楚辭時作真行帖臺府歲舉員求者例有  
挾孤士乏梯媒剛腸羞婦妾諸公縱憐才或被權勢劫  
誰能推輓之士論得欣愜

東歸同年三山王簿賓之趙戶立父連簿仁父  
黃上舍偕行分道買樽酌別

我從京華來濁暑不可通藍縷一征衣邂逅四君子臭  
味同芝蘭鄉井連桑梓王君吾兄行派出銅川氏一飲  
吞百盃一揮爛十紙此是鑿坡人非以棲鸞枳黃君天  
庠英貴名百日起三年拜賜師行雪穀函耻後來幾英  
豪願作榜下士小連真可人犀玉浮冰峙再鼓氣不衰  
收科趾前美朋山萬青矜求識習鑿齒立父天族英雅  
非膏梁比青桂近嬋娟紅蕖映青泚名駒產天廐一日  
當萬里今夕知何夕德星偶同晷明月入觥船涼颺生

劍履相逢吳山頭相別閩江背交情托管鮑同年序許  
李明日懷美人娟娟隔秋水何以慰我思馳書寄雙鯉

東歸至衢城十五里頭

征衣犯火雲來自長安道浹背汗淋漓遵程行數跛險  
阻已備嘗習氣覺如掃京華紈袴兒顏色差強好玉笋  
酌玻璃金盤飮水菓享此竟無端榮枯太顛倒嗟全數  
之竒涉世嗟枯槁青雲志未酬午夜心如擣浪踏軟紅  
塵有懷白雲老決策賦歸歟受此大輶軻倚杖立沉吟

持杯澆磊砢生平忠憤心皎皎通窮吳一身不足憂世  
途深可悼徃歲淮甸間邊吏困科瑣金鼓聲漲天溝壑  
填肝腦一旦計之窮首謀伏天討眈眈慾無厭百計需  
金寶今者馳使車囊橐費賚裹乳臭坐廟堂苟免及身  
禍誰知鴻鴈鳴朝夕不相保旱蝗重為災四望無青草  
我輩獨何心日夕憂江左豈不欲救之勢力顧未可敬  
持一瓣香好為蒼生禱何日鞭五龍澤之以霖潦手提  
四方人脫之於水火



父執德化陳宰叔高槩寄詩和之

欲作好官易與時同仰俯欲作好人難前修嚴獲矩馬  
安為巧宦孔光位宰輔貽臭汗青中詬罵之所聚胡威  
清比父魏謩直肖祖世家有若人百不一二數夫君少  
壯時筆力迫韓杜晚歲宰一同治最方卓魯中都清要  
官唾手可搏取徑掛神武冠去國身如羽隱几挹青山  
稱觴環綵舞導養學熊鶴鈇永成龍虎妙香叅鼻觀虛  
白生靈宇興來聳文筆象物蒙藻黼客至開香醪鯨量

少儔伍我登清風堂人今道則古敬宣與狎崇所擇聽  
張禹

別永福張景山

我友滿天下面交如斗量最晚得張子羣中孤鳳凰若  
氣分高蓋妙年侔洛陽趨向頗近道才具已老蒼蘭若  
參文盟過眼五月彊別我求贈言握手吐肝腸學貴根  
書茂積貯焉可忘如行千里路須具三月糧文亦有活  
法先使意氣張如破勅敵壘須擒賊中王子家藹文獻

庭砌多琳琅歸歟力種績宜親師友良植本日以大養  
氣日以昌學豐敷為文如富出所藏襟期要榮榮俗物  
徒茫茫他日泉石下候氣視北方知有滔滔者非予誰  
其當

白髮吟

明發覽青銅寸白墜華簪懸知不能免豈意遽見侵憶  
昔隨羣兒總角混青衿縱弱不好弄既冠知惜陰時開  
磊塊曾澆之以古今二十偕計書進士路歎嶽遲遲十  
四年一第酬苦心今年已六六暮景來駸駸一髮照我  
眸衆髮立森森忽然一失笑政要渠相尋有田願種玉  
有腰願垂金富貴豈不好勞鹿那能禁何如一床書侑  
之綠綺琴遠參蘭茝香清玩山水音高歌月滿梁醉卧  
斗橫參待教頭半白掛冠老山林飲犢青草埔盟鷗白  
沙潯憑盧喚張陸聽我白髮吟

白頭嘆

日月轉四時團團輾清昊人生一世間輕塵棲弱草寒



暑不相貸容鬢豈常好嗟予涉世紛聞道苦不早塵勞  
縱掀簸冉冉風中葆行年將四十素標已插腦星星纔  
數莖爛熳色勝縞耘鑷雖暫無安能遏衰槁黃精似可  
餌已白恐難掃幸有琴心文真訣堪却老華池溉隱芝  
青青可常保斯理不吾欺從今勤探討要當驗他時難  
為常人道

青銅作明鑑皎皎鋪晴昊照我沐初晞幾縷經霜草本  
無適俗韻頗識園林好何為浪自苦落得衰顏早懸知  
日夜改青絲成素葆達人遺世累土木視肝腦那於形  
骸間計校元與縞彼獨何人哉而我嘆枯槁壯年不可  
挽過日如霜掃但有歲寒心不逐冰霜老誓開三徑荒  
種藝雜庸保雖無大藥資尚得恣幽討此外盡悠悠置  
之不復道

題江郎石

翠峯天外來生平眼不識道傍問行人指此為何石云  
是江郎神茲地顯靈迹岳瀆孕精靈陰陽陶器質壁立

千萬仞憇然翠欲滴縹緲出塵寰上與太清迫伏如蛟  
龍蟠聳如麒麟逸開如旌旗揚斂如圭綬直交酬如大  
賓相敬見顏色特立如正女齋莊不可昵勇如毛大夫  
囊雖推穎出烈如藺相如挺身衛全壁勁如傅介子叱  
咤在三尺直如太史公嶮巖操史筆裒萃許精英狀出  
太竒特誰言造化工於物無雕刻我來揖清標倚杖立  
歎息年來天柱傾誰是扶持力願移此靈根支拄天西  
北三光五岳氣要使合為一血食千萬年與國同無極

和趙簿題席麻林居士小隱四韻

公子有竒節歲寒心卽松千邱仍萬壑是中雅能容晚  
來萬事懶獨有詩不慵諸郎富文采筆端聳孤峯

繞園萬竿竹竒壑千丈松此物匹高士坐羞桃李容客  
至談世故接之令人慵相看兩不厭晴昊倚高峯

碁聲響蒼石茶竈燒枯松故人惠然來風竹為先容野  
性曠而適機心踈更慵生憐謝安石携妓汙名峯

笙簧豈不韻雅景受風松紈綺可為裳靈均采芙蓉古



來曠達士世賦亦太慵可望不可狎人如雲外峯

題趙別駕委齋詩

別駕來訪別徵我委齋詩敢問委之說別駕自發揮萬  
事悉委分吾何容心為抱槧游文屋去取委所司一戰  
偶得雋敢誇詞藻竒隨牒走仕途薦舉委所知一朝獲  
通籍敢恃妍媚姿不見百里奚非黠亦非癡爵祿委儻  
來飯牛牛自肥不見塞上翁無喜亦無悲得喪委自然  
失馬馬復歸委懷在琴書粟里真吾師委順聽時命香

山不吾欺吾以名吾齋曰委不亦宜王子曰不然我言  
異於斯人性涵萬善其位配兩儀凡天所委付受者不  
得辭行藏道汙隆進退時安危委禹以治水胼胝敢言  
疲委尹以復辟寵利非謀私經制委姬旦述作委仲尼  
今古理無二聖賢人可希綱常或淪斃委我開訓彞楊  
墨路必闢韓莊門宜麾宇宙或傾仆委我力扶持補天  
出媧石浴日弁咸池饑者委我食應落寒者委我衣一  
或負所委是委天職虧若君所言者莊老同一岐梁以

苦空壞晉以清談隳流弊至委弃往事真來規世道真  
險隘天將委之誰上不能使爾夫豈無良醫因詩重感  
慨當有評是非

送族姪千里歸漳浦

吾宗居漳濱粉杜足不到迨歲携琴書迢迢以謁告草  
木同臭味水火隨濕燥行色念辛酸開樽勤燕勞葭管  
陽方弁凌室永新破語言頗有味知子為跨竈日暮望  
白雲江頭理歸旆別我乞贈言求以篤宗好謝安自薦

元杜子每念佐子真元佐流我譽不為過惟學無他達  
損益在勤惰我昔少年日螢雪功自課嘔肝綴文詞懸  
膽警坐卧甑寒心自憐筆凍指欲墮牛羊事芻牧鴻鴈  
謀梁稻慈親日待養一第天所報願子繼自今書田深  
種播定力要堅持居安謹無躁青雲信有梯我已為前  
導後來當有人衮衮如鄉音和洗耳候凱音嘉節迨吹帽  
呼童辦楮英為子西征賀

四十自壽



前四十年非追之已莫返後四十年是圖之良未晚水  
涸自見埃木落知見本善者契吾機今復猶不遠養生  
先節慾葆粹在懲忿聖賢人可為勿使善惡混

寄居元職方北第呈西鄰盛進士

解褐去鄉里宦游一紀餘抱感今來歸茫然無屋廬暮  
瞻還林鳥朝羨趣淵魚淵林各有歸曾不魚鳥如元侯  
雅好義假我舍北居入門掃埃壘閑草以次鋤貧賤誰  
顧門豈必容高車餘杭衆富家碧瓦侵太虛土木雖無  
情亦與儒冠踈所幸並舍賢昔年同詩書何茲瓦礫陋  
復爾鄰璫璣鄉田及同井此義無忍諸

寄同年新塗王宰夢弼

玉筍高嵯峨異石光燦燿紫蓋有佳人出為花縣宰佳  
人秀吾宗天姿最高塏飲冰抱絲弦紉蘭纒蕙苴疇昔  
糾郡掾辯獄亦幾殆人命我所爭斗粟何足愛上官翻  
相知剡薦異寮案及膺民社寄直道肯自悔以柔克高  
明為政尚慈愷農扈飽春和荒年獨不餒猾吏履薄霜

洗手畏納賄桑間雉上馴壁上魚多鯁昔我在湘幙相  
從垂兩載書生守方拙時糝不入隊惟君雅知心刮目  
賞竒磊君有桃李栽我獨芙蓉采無何風木悲天乎余  
何罪歸歟泣君蒿以矣嬰病痲除夜接君書烏欄墨瑾  
瑾訪問死生餘警語鞭不逮為言剛近仁直性真難改  
近乃加和平痛自產光彩萬事必宗道衆流湏納海隨  
時少屈伸正真固常在再拜君之言書紳戒荒息時事  
苦間闕誰歟穆天緯來書尚可為蒼生久相待

靈白湖歸憇林氏坟庵僧出能誦予舊詩設茗  
椀蒲食以詩贈之兼寄呈林六十兄

霜風襲客喪朝日曬農背誰遣役此軀隱痛在五内宿  
草漸重生跼蹐處覆載扶衰策瘦筇乞靈問龜蔡徃來  
纔信宿屏息過闌闌夙駕三十里僕夫已告憊小庵闕  
道旁丈室藏法界叩扉僧出迎面熟不猜怪白髮久不  
梳爬癢得痛快荷設茗椀供仍有蒲食配去此已五霜  
重來發孤慨一飽猶可謀三釜已不逮退藏心甚甘世



故肯相貸博陵隱君子堂萱春未艾悠悠我之思此日君當愛

簡延平李公足擇善

原註時隨侍其父為興化令余在制中

昔人重相思千里且命駕我家去游洋相望纔四舍偃息豈不思吉服詎可借惟憑一鴈翔敢望雙鳧下日者聞琴堂墨綬將解卸東閣領羣英勝遊當首夏惠然訪九仙雲物爭迎迓拂石納晚涼秉燭娛清夜吉碑共摩挲吉夢相矜詫物色故老言赤鯉何年化題詩富錦囊仙境為增價是地近吾廬過從何未暇初傳尚半疑後信良多訝世態如浮雲炎涼更代謝高誼定不然寄聲來慰藉

簡林公似

窮猿不擇木祥鳳宜棲竹高門結駟榮陋巷一瓢足仕有時為貧貧乃急於祿夫君何所欠百事盡從欲新諧種玉婚大敞堆金屋鏡裏顏尚朱庭前萱正綠中州不徜徉炎海甘馳逐遂令君子心度以小人腹我貧甚去

年全家以食粥獨醒妬人醉譏誚那免俗名節千載光  
富貴一炊熟朋友嚴簡書敢以石攻玉

寄浙漕王子文楚以思君令人老五字為韻得  
詩五首

長沙一傾蓋情好如塤箎閭閻十寒暑何時不相思君  
為睢邸教再挹冰玉姿升堂拜壽母摩頂識馨兒叙舊  
方戀戀臨分轉依依自是成鴻燕羽翼竟差池音問以  
不接清宵夢見之魚腹得尺素羊胛經幾炊陳雷不可

作千載同襟期

我友半湖海知心吾子文君忙我已老事事不如君君  
生通貴家我出寒素門君披貂毛裘我着犢鼻禪戲綵  
君有母列鼎共清溫我早失烏哺空山悵白雲弱冠君  
有子世科將襲芬我子方垂髻詩禮未有聞凡此皆不  
如官職不必論

原明有申公公休繼文正後來諸名家有子多不令堂  
堂先太史孤峭立萬仞身不為從官美謚君所命子文



為之子壯歲名已盛榮華付倘來節義傳心印波流石  
不移火熾玉寧盡嚮來燧天䟽每讀必起敬相期輝國  
史何止續家乘

西山門下士雜襲如魚鱗惟我與子文受愛異他人送  
我長沙序言言足書紳贈君樵川詩字字示寵珍潛齋  
養正堂兩記猶諄諄為君說太元藏心養靈根為我演  
蒙頤山立靜澄神先生愛吾徒不啻子弟親將何報此  
德相與玉其身

我本麋鹿羣官職不要討儻石倘有儲山林堪佚老焚  
香旦告天非為其私禱一願屢豐年田疇足禾稻二願  
息兵戈塗地無肝腦飲水樂在中茹芝顏轉好篤信而  
好學守死以善道佩此八字符傳為子孫寶作詩寫殷  
勤未識蒙印可

與友人飲分等字韻

君詩敵曹劉我才慚碩顛隱几共團圓醉鄉從醕酊強  
吟蹙眉尖得句蒙首肯吟蛩聲唧唧銀燭光耿耿相看

不惜夜自足攻逆境搜腹憐龜腸朶頤傍羊鼎論文更  
非儔義氣略相等世情似紙輕交道如菰冷願堅松柏  
心歲寒青挺挺

贈傅神莊士儀

畫工亦無數好手不可遇非是畫事難難得畫中趣况  
寫佳士照又不比行路莊生頗工此為我掃尺素儼然  
山澤臞詩肩瘦鳧鷺老色雖上顏瘦塵莫能汚生畫甚  
迫真餘子等孩孺得錢散酒家無心問婚娶醉被風雪  
欺術招鬼神妬長安多貴人朱門富紈袴使聞生之名  
當即懸金募我貧亦如生正以詩窮故以畫博一詩兩  
手相分付

殿廷初考諸舍約共賦詩

紹丑夏初五皇帝下明詔大廷策羣英虛心聞道要初  
考凡六員同時赴宣詔宮講絮齋子典刑真克肖曹丞  
道鄉孫道心長返照何殊鐘在簾宛如刀出鞘谷口亦  
何人才德俱富邵走也分塵埃識見等螢燭亦獲在選



中所得過所料宮燭分夜輝御香供早燒羣羽競赴矰  
衆鱗爭入釣意氣雲龍翔精神風虎嘯或巽入柔行或  
疾聲大叫或自出機軸或工事竊剽或寫雲和音或鼓  
折揚調或作朝鳳鳴或吟蚯蚓竅好惡隨品題寧復相  
譏誚上方富春秋明齊日月耀涓露增滄溟微塵填嶽  
嶠乙覽公平章甲科須直峭諷必納祈招箴必容庭燎  
國步賴扶持民瘼需砭療詰朝已峻事杯行可以醕

謝京尹惠酒饌

逐客次江干復此風雨夜元戒念寂寥更僕相慰藉醕  
醪實珍肴寵光生邸舍妻孥共感感道路或猜訝謂此  
偃蹇蹤橫被彎弓射彼哉簧正巧或者石猶不同志欲  
過從避當輒驚馬怕曾謂十連遵理煩無頃暇惠顧及無  
聊多言莫為謝平生伏羲信正色叱姦詐此樣不入時  
致入人話靶明時方獻文安得有謗罵獨以殿廬中語  
言少假借遂犯螳螂怒間坐鷓鴣嚇先期欠簾幕坐是  
罹咎獲公施不報恩高義等嵩華一言挾纊溫所嗜非

酒炙天日方清明罪過宜宥赦白璧可洗瑕煩公叩造  
化

簡同年刁時中俊卿詩并序

刁家衢之江山未第時作老農行以諷其長官言  
辭甚苦今為綏寧簿被鄒帥檄來董虎營二千間  
之役諸邑疲於應命民間悴於科募一日稟帥又  
欲任浮屠宮宇之責帥以小綏謝之余退而作詩  
即以所諷令者諷之

讀君老農詩一讀三太息君方未第時憂民真懇惻直  
筆誅縣官言言虹貫日縣官怒其訕移文加誚斥君笑  
答之書抗辭如矢直旁觀爭吐舌此士勇無匹今君已  
得官一飯必念國民為國本根豈不思培植其如邊事  
殷賦役煩且亟虎營間三千鳩工日數百硬土燒熾窪  
高崗輿巨石山骨慘無青犢皮腥帶赤羸者頽其肩飢  
者采其色憔悴動天愁搬移驚地脉吏號餐鷹隼如攫拏  
何顧惜交炭不論斤每十必加一量竹不計違每丈必



羸尺軍則新有營誰念民無室吏則日飽鮮誰憫民艱  
食州家費不貲帑藏空儲積間有小人儒旁獻生財策  
大帥令龔黃豈願聞此畫夏潦苦不多秋旱勢如炙願  
君在莒心端不渝疇昔祭人即吾人一視孰肥瘠築事  
宜少寬紓徐俟農隙至如浮屠宮底用吾儒力彼役猶  
有名何名尸此役君言雖慙患帥意竟縮瑟同年義弟  
兄王事同休戚相辨色如爭相與情似暱余言似太戇  
有君前日癖責人斯無難亦合受人責我既規君過君  
盍砭我失面諛皆相傾俗子吾所嫉

簡復齋陳寺丞子表夫知丞併呈真西山

復齋吾之師高山儼標致僕嘗函丈間乞得四箴字及  
來仕京華登門願受記復齋首肯之贈言簡而毅殺身  
可成仁舍生甘取義此生尚可輕圭黍眇爵位僕退書  
之紳雋永言有味充員京兆幕萬一可行志赧顏斥吏  
胥冷眼視權貴婉畫孤無明旁觀輒相忌朝肆緝緝纒  
暮遭申申詈聖主初臨軒不才叨考試諸賢憚生語一

律愛軟媚我喜衆所驚人取我必弃間有植私思了不  
恤公議枘鑿不相投畧獲焉得避襍被去候潮襁褓有  
幼稚少需辰之良解纜辭清渭邂逅復齋子入京方卸  
轡為言東湖上英才日以萃窮伊洛淵源傳紫陽位置  
要使莆三邑薰為善良地僕也聞斯言歸心生兩翅平  
生真西山赤心愛善類誨我以沉潛意同言小異二公  
負名節可望不可企勇退在盛年高卧看兒戲我拜二  
公顏回儻無愧作詩欠硬語呈似賢昆季謹勿示他人  
恐為吾黨累

親舊問盜作詩四十韻以答之亦可備野史之  
錄

我自來京師已丑之十月道之建劔間行行遇兵卒問  
之何為行對言聲哽咽初只因臨汀鹽商時出沒縣官  
事張皇星夜聞帥鉞帥乃出捕兵此曹輒猖獗加之江  
西寇恃嶮護巢穴向來誤殺降貽禍今尤烈合黨肆紛  
披交鋒爭桀黠聚落四百村室廬遭毀藝轉徙臨昭陽



孤城危一髮帥方實歸裝視此苦不切惟漕暨庾臺協  
 心圖樸滅移文責十連義激詞語辣就檄劉權軍專城  
 植鍛戩又有一老尉賈勇抗鳴鶴賴此所居民猶苟旦  
 暮活我聞此卒言憂憤中腸熱及歸抵吾廬保伍亦團  
 結或恐汀邵寇餘燼尚分裂或疑鼠狗徒乘間敢竊發  
 吾鄉號樂國目不見寸鐵一聞征鼓聲縮頭畏如鯨新  
 歲或訛言城居竟搬挈丁男肩欲頽稚女足不韉相顧  
 莫為謀去守將安決汝知誨盜誰吾能為汝說年來民  
 賊多田里困根括單丁火亦追逃戶租盡刷猛虎政太  
 苛攘鷄手已滑剝床忍及膚椎肌慘見血吏肥富熏天  
 民貧怨刻骨及此皆幸災狷險何聒聒古來盜賊興此按  
與下句不接考次首官吏去號餐餐大者籍其大小亦實  
和韵此處脫六句重罰人心知是非端可以理折民賊盡芟夷雖賞之不  
 竊

鄭昂叔和余問盜詩末及山東事弟姪輩又問  
 山東本末再用前韻答之

江左百年來英雄老歲月空糜東南財坐廩驕情卒嘉

定懲開禧廢食因一啣國論規便安神州聽淪沒議和

益金繒諱戟鈍斧鉞邇者天禍之西北逞狂獺一舉靜

邊塵犁庭掃其穴或如釜中魚或如火烈烈乘間鬻觸

衡復有山東黠長驅淮甸間大縱山陽藝或屠制帥家

許姚或髡守臣髮鮑魚肉我王人苟夢王首領春蔥切塗

炭我生靈聚落炊烟滅嫚書揭通衢著語太辛辣供帳

王者居左燾將軍紱按前首專城直鍛往來青齊區健

比霜天鷓一名娘子軍犄角同生活貪心肆陸梁烽燧

競熏熟我事南方強謂可以恩結衣裳一顛倒茅土甘

疏裂納侮忍包羞容姦噤不發誰與生厲階正爾錯鑄

鐵彼計甚詐狙吾謀類跛鱉歲幣久椿儲復為彼齎挈

邊籌乏寸長徃徃如拆鞅相顧皆狐疑莫能抵龜決心

知示弱非成事付不說邊民亦何辜一孔盡搜括戰艦

尾相銜義丁家盡刷需求意無厭許可舌太滑譬之護

癰疽包裹畏見血僅僅外留皮駸駸齧至骨理勢有必



然五言非強賂惟願天聽回攬權制生殺毋倒太阿持  
 母憚強弩末母貽養虎憂母肆饒蜂孽廢籍起忠賢窮  
 荒斥竒餐一朝出六師聲罪行天罰名正事必成本強  
 衝可折銜璧許來臣寸鐵誰敢竊按邁於紹定三年充  
 考試官詩首言來自  
京師已丑十月應在殿廬被劾免官之後李全於  
 是年十二月寇揚州時事昭合故二詩序次在此

弔何巖

可憐何巖民何罪遭此劫寇攘發他邦警報經旬浹官  
 府過張皇民居少寧帖昨方科箭翎今又催甲葉厚斂

招提金名色何所挾昌言募土兵相與守城堞繡衣意

其欺急下徵兵帖束手無一人差官許專輒縣官至何

巖丁壯被威脅黔首畏墨黥依違謀未協口或出怨咨

心實先震懾官兵胡為來紛然肆漁獵室廬罹燬燒老

稚殘鋒缺山徑至通達輿尸交積疊敢梟平人首偽奏

譙門捷殺民汝何勇殺賊汝何怯此鄉風俗淳武斷無

豪俠目不識戈矛家盡事耕鋤豈應有叛謀誰子為荆

聶黃巾縱挺威吾地足未涉官吏大不仁使爾血先喋

千家聚落蕃幾代農桑業一望成邱墟獨非我臣妾安  
知此恠事不入賊間謀設或擣吾虛小壘真定業舟中  
敵國多况望蒸徒楫書生憂世心夜半不交睫作詩弔  
冤民詩成淚盈頰翻恨天門高不與閭閻接丈夫貴敢  
言女子乃咕囁

信手閱清溪詩一首依韻即事

久雨妨好春朝暮無休息出門欲有行苔滑泥餘尺四  
望人煙稀千山鳥聲寂饑寒不肯歸青帝覺無力况有

黃巾徒鄰郊漸相迫虐焰挺戈矛連車掠金帛王旅猶  
稽留民兵半覆沒羊狠來莫當鼠竄去無迹踐蹂清野  
塵原草不能碧世運何乖張生靈罹此厄丁壯抱枵腸  
駢頭受科率氛妖誰掃蕩氣象太窘窄書生憂國懷半  
夜轉加劇相倚如輔車忍視為胡越富家太不仁增價  
糶斗石但愛囊橐豐不憂狗鼠黠甘為盜貯儲遑恤人  
飢渴兌渠曷日殲苦潦何時歇作詩愧北征聊以志歲

月



攜筇出尤嶺嶺頭坐俟輿夫不至

我居南麓下頗利君子邀如何溽暑初涉此復嶺峻瘦  
藤代筍輿路熟不待問拂石小盤跚心愛木陰潤清風  
解人意陸續松杉韻掬泉嚙茗芽竊賞此味俊我坐亦  
良久我僕行何鈍平生性麋鹿合有幽閒分舉足履世  
途退尺進僅寸曾此小遲連而足置喜愠繼今出處同  
冥心法天運斯游悟窮通持與達者論

送黃成甫殿講被召

泉為閩望郡山海來航梯琛貢交異域珠貝象玳瓏腥  
風易沉人濁如雨後泥不屑受點污除非辟塵犀南渡  
賢太守前稱王梅溪中間西山真後有苕川倪近歲李  
竹湖四賢玉雪齊他守非不賢多以慾境迷一罅苟可  
投趨者由旁蹊利心長萌蘖公道生疾藜鴉見腐鼠嚇  
鳳甘梧桐棲物性殊潔穢人品隨高低君侯第一人壯  
氣千虹蛻天墀一長鳴萬馬不敢嘶為州上異最趣覲  
下宸奎歸裝試檢點定無南物齎時艱方急賢君命焉

可稽巨艦方解維穹車正發輓憶昔端平初衆正咸登  
躋如入墮夢境忽聽警旦雞云何不常泰一變成孤睽  
大老遽淪謝善類誰提撕菊坡未起南鶴山亦歸西朽  
屋費撐拄洪流欠障隄蜀道橫豺虎邊城喧鼓鞞流民  
滿京輔溝壑填髻倪弊事非一端言之重酸悽醫國要  
大藥去膜湏金篦君子與小人却是一巨題願為君子  
者名檢身自視皎然不可玷琳琅別介圭凜然不可犯  
貞女處幽閨必服羣小心始去未中梯義利生一念治  
亂分兩畦老我以狂故屢為語甯擠朝行辭鷓鷯野性  
便鳧鷖附熱恥翁翁耐寒甘淒淒荷君不世情猶念故  
人綈紅絮正飛零綠陰被長堤送客洛陽橋春風逐馬  
蹄相期在遠大不敢惜分攜

有客一首寄溫陵史君趙侍郎涯

有客至自泉為我出嘉話泉得趙史君誰人不稱快天  
生冰玉姿系出龜琴派標峻埒昭回氣清融沆瀣方在  
諫省時朝紳推鯁介及膺承宣命未到心已解真李報



政後紀綱日大壞有坐泉山堂不守盂水戒戶庭交賈  
胡寶貨通買賣繼者廉而慈卧疴力衰憊暴吏恃饗官  
珠求及管蒯大姓雪細民怨仇起眦睚我公方下車當  
食輒興喟寮屬愛貧泉爭飲不為恠予將輩元結誰肯  
伍樊噲職曹與舶屬時號大駟僧兩疏効四凶人喜如  
疴疥州胥富蓋藏至則繫以械曰此其渠魁豈止為胥  
絳縣官在黠胥期限稍寬解山判吁可驚即日命追解  
惟仁必有勇勇去禾中稗良善苦勢家至則行決夫府  
史例橐姦今乃聽自敗無欲始能剛剛拔園中薤我起  
瞻四方風濤極澎湃砥柱設無人淪胥靡所屆理欲差  
毫芒公私分限界公豎硬脊梁浮榮等草芥出處民咸  
休行藏道隆殺授公以師旄一路息彫瘵位公以中書  
舉世警矇贖宇宙倘清明行有大除拜作歌者何人江  
左狂生邁

題江知觀靜齋

蠻觸當戰衝蚌鷓據爭境相持無了期復命終歸靜人

事苦紛拏世態異炎冷遠抱異俗觀照以清明景余生  
 涉畏途所至虞機穿求富恥執鞭圖名成畫餅道侶得  
 洪師喚我夢中醒師如辟塵犀神觀最清警徐粹息天  
 倪運斤優匠郢結茅規數椽討勝事幽屏楹檻疏以明  
 規撫肅而整晝永篆飛煙風來幡弄影開卷課黃庭煮  
 茶汲清井以靜名其軒會處心自省吾廬雜塵囂相望  
 限一嶺煩師縮地脉得我便造請別來火雲張今見霜  
 宇淨寄詩當梅花一笑師當領

學易齋

太極分陰陽生生之謂易易有乾之元生意露消息先  
 生易中行日用而飲食全體純是仁本自元中得克已  
 下工夫心臺皎如日處則為顏曾出則為禹稷所以學  
 易齋孜孜奉天職滿腔皆春和八荒開壽域

余君肅曰嚴忍齋

君肅吾良朋天資秀而穎以忍名其齋求余為序引余  
 聞刃制心其字謂之忍一忍寬百憂百動歸一靜人心



本至明萬善集虛境外物一障之天真隨晦泯意猿肆  
頤頽氣馬浪馳騁以忍作防閒如物有繩準聖賢養心  
學最切是懲忿愚者一不校魯者三自省行行無取材  
宜為夫子哂師德豈懦夫見善必操秉唾面令自乾可  
以愧不逞公藝忠孝人家法肅而整九世有盤盂一字  
其要領願子繼自今去過貴乎敏育德必體蒙辨義直  
觀井直融妄盡消心清事亦省我少染習氣近亦痛除  
屏作詩雖警君且欲以自警

堅固堂

五常之有信猶土相生植四端有諸已體用歸於實先  
生行實地外方而內直硬作鐵脊梁許身衛社稷神授  
五字符得大堅固力不為聲色搖不為利害怵所以堅  
固堂山立而玉色願言愛精神自壽以壽國

常惺惺室

性命同一源萬善天所賦五行水生智正以虛明故先  
生原命宮水與金夾輔清質自生明冰壺澄月露窮理

以致用幹事必正固與國作著龜應物公權度所以常  
惺惺一室神明護室中主人公壽比喬松數

代簡奉寄三山方時父遇游幾叟明復

昔我游三山稠中得二友初交方時父後識游幾叟大  
比獻能書厥歲在丁酉垂釣文海中修鱗上鉤否蔡簿  
校文回日方其所取有高說夫者姓名出其右高游本  
弟昆紫荆偶分割游雖遲再薦楚公楚人有余評時父  
才進士中少耦詞絕似秦七詩已迫黃九幾叟尤不凡

耿耿良自負英辭沮金石直氣干星斗等是青雲人科  
第爭前後射策對天墀會須為舉首三年一倫魁須服  
天下口毋為陳誠之要作張無垢狂生分不才垂老未  
覺醜嚮坐太饒舌相看擁衆手六階何惜鑄百謫亦甘  
受不愛騎鶴姿看人作太守只讀相牛經教子事農畝  
之地堪置錐仰天頻擊缶二君最知心一別忽許久作  
詩分寄之或賞千金帚併簡潘庭堅何時一樽酒

寄陳士登元龍士登書問盜且責予不貽書當



路為剪除計予方以罪歸有言誰見省作書謝  
之

悠悠我之思東里陳驚坐更闌夢持環晝永心搖蠹一  
春苦風雨我因南山餓君樓百尺高頭上天幾大於我  
未忘情更僕修夙好耿耿憂世懷急於聞警報為憐上  
四州豺虎正喧噪虐焰欲熏天獲人爭斬剉將州豈不  
武棄縣如涕唾官軍望而奔所至徼宴犒鄰境近憂惶  
刁斗急巡邏君責我以書何時乃高臥曷不出良籌亟  
為當路告當局自能迷看局當不蹉我壯君之言義起  
千夫慙顧方謹三緘此戒那可破諸賢各有謀何欠儂  
一箇君家昔太邱能愧梁上盜毋為陳君短此語更傳  
播吾家昔顏方能正屠牛暴勿使王君知叩頭甘謝過  
兩家俱德門今有若人磨前時何巖警召亂在縣左賴  
君告少仙全活幾髻髦但推此仁心古人不難到鄰里  
貴有恩急難相憫悼裂券蠲宿逋減貲糶莊課肯令州  
中人指我為竒貨盜亦有道者仁里敢桀駭焉忠信蠻貊

行豈弟神明勞我持一瓣香日為蒼生禱吾君甚愛民  
恩德侔覆幬社稷福靈長妖氛行屏掃吾言非誕迂有  
唱君湏和

送表弟陳一鳴堯章入京

科目狹為途英雄多短氣賓賢詔一頒應舉紛如蝟低  
心逐時趣煉語避忌諱得者固僥踰失者徒歔歎巨鱗  
不上鈎修翼不入尉鄉選亦孔艱計臺征以彙我嘗校  
蘭省厥歲在乙未時收甲乙科多是戊己尉國步矧多  
艱志士發長喟襄蜀漲氛妖江淮方鼎沸毛錐無能為  
長劔使人畏朝能立寸功暮可攫富貴二子趣玉京道  
遠不吝費進身假梯媒流品孰涇渭世科藉此登親望  
始覺慰老我謬憂時周發遑恤緯諸公忌生女悉力攻  
謗誅藿食可充飢荷裳尚堪衣功名付君等山林吾有  
味

以喜聞過墨贈吾壻鄭純父瓊

西蜀游文昌贈我墨兩筒墨上署嘉名名曰喜聞過過



失人誰無剛褊柔易悞衆人巧自文君子喜人告予性  
失之剛所患在急躁未嘗不佩韋因循及老大不能如  
師德受人對面唾至使巧宦徒目為背時貨子性失之  
柔鮮有特立操嗜欲微萌芽左右紛投好不能如乖唯  
按劔警坐卧中心欠所主恐似風搖蠶乃翁匹前修德  
行圭中瑁承家合有人前猷宜久蹈賢母慈西嚴熊膽  
親調和養志最為難家聲出堂與吾女正抱疴朝夕煩  
拊勞要相敬如賓毋蹤欲長傲女亦嘗聞詩綠衣戒顛  
倒候其疾之瘳蘋蘩能采芼內行儻不愆事業當遠到  
賢者後必昌積善天所報持墨為子箴進德謹勿惰墨  
卿子良師莫被渠看破

送春有感

東君行趨裝桃李事如夢蝶懶欲息游鶯老不好弄殘  
紅正可憐更禁風雨送榆莢羞獨飛却惱楊花共去年  
於此時客食紅塵閑眼看豪俠兒躍馬青絲鞵美姝舞  
娉婷吹簫來紫鳳開樽六一亭偃蓋飛來洞我亦強行

吟詩成和者衆時序易推移人事少閑空翻思年時樂  
已如耳邊哄清曉坐孤寺晴曦照華棟沙平嘴帶鷗山  
遠腰橫竦閱書眼倍明拈筆手猶凍掃地焚甲煎呼童  
開臘甕汲井得甘泉瀹茗試新貢短章寫我懷謾遣兒  
曹諷

獵者

原注見方雷桂  
子直言其事

山中有獵者設網張四隅稚鷹為所維性命懸庖厨母  
鷹至網外躑躅相悲呼明知獵者意於已併覲覲柰愛  
不可割投網與子俱獵者偶省悟攢眉發長吁縱之與  
偕活長揖謝獵徒焚網毀毒矢放鷹逐韓盧人物強非  
類天性元不殊愛母寢皮猿惜子喬腹魚人均作此念  
可廢佃與漁獵者仁孝心洞然貫體膚彼為中國穿愧  
見此獵無

壽方右史德順大琮生朝

大哉天地仁生意無盡藏芳春三月時五陽正敷暢在  
卦則為夬澤下於天上篤生萬人英出應蒼生望退然



處鄉閭溫恭加直諒萬頃波汪汪一團和盎盎凜然立  
朝廷謹論動旒纁張膽輸蓋忠顏顏斥庸妄寧為鳳鳴  
陽不作馬立仗玉皇笑點頭諫疏堪屏障讒者何人斯  
嚴科欲監謗網常盡斃淪天日忍斯誑白壁汙蒼蠅鳴  
珂辭翠閣膏屯施未光幹蠱遂高尚郭外新結廬野色  
耽虛曠積書遺兒孫開筵延輩行及此紱麟旦仙壺敞  
方丈台宿煥祥輝喬雲賓景貺有客前稱觥致詞太豪  
放海內今何時四面波濤漲督府冊元戎廟坐轅門帳  
妖氛不能清惻焉賴汝將都堂留一老手攜靈壽杖顛  
危不能扶又焉用彼相時流忌生語相顧效啞瘖回首  
憶端平芳菲僅一餉大號正揚庭一陰敢陽抗治少亂  
日多古今同證狀公抱葵藿心未忘太陽向天運有推  
移陰陽迭摩盪夫進則為乾羣龍神氣王公主善類盟  
任重在力量周道當中興方叔猶必壯松茂宜栢悅呂  
鳴因律唱喚起矍鑠翁吾軍亦可張壺山獻寶熏壽水  
足醇釀一辦虬吐煙一吸鯨吞浪壽公乃壽國他語徒

冗長玉鼎願精調金甌保無恙

書懷奉簡黃成甫史君

憶昔紹定元被命考廷策偶遇袁君房玉墀日將夕案  
頭得君文喜躍越三百張燭朗誦之相與手加額若人  
作掄魁餘子當辟易時有詳定官嫌君多指斥衆默余  
獨爭言厲面發赤紫宸一傳臚壁水推巨壁諸君始相  
賀時相頗不懌爰有小人儒從旁肆逢蠹螿諫官工逢迎  
霜簡肆捃摭此事人能言本末甚明白暨于端平初天  
奪老姦魄散地起忠良邱園紛束帛君先登瀛洲講筵  
賜重席余亦試玉堂朝有愈之跡啜茶熏玉蚪投餅呼  
金鯽同校南宮文等是西山客無何陣脚動君出為方  
伯館中失名流我輩苦嘆惜西山遽仙去局面日改革  
余入對未央苦語出肝鬲淮南寃未消元載家當籍外  
黨分牛李內寵怙秦虜臣愚懷隱憂厚此其敢踏虎鬚  
敢一編龍鱗敢一逆自信填海隅復中含沙射移舟返  
蓬萊伏隩甘冰檠君正舞萊衣清香籠畫戟年豐富紅



倉風順多琛舶我舍抵是州相望纔四驛幽棲懶及門  
一再通書尺起家倅漳濱始訪二千石居官未半暮臺  
評又尋摘既罹闕虎嗔宜有人猫厄歸途抵溫陵除夜  
大促迫所親有室廬許我相假借蓮灯看爛紅栢酒浮  
重碧去家差不遠朋舊來絡繹雌堂在何許一望弱水  
隔山鬼巧挪揄室人交編謫平生重名檢義利最知擇  
冷眼視輿金寶身甚拱壁世途赫赫炎衆手所共炙誰  
能效李錐作計事鑽刺蒲葵安可常秋至輒拋擲貴賤  
見交情書門何恠翟趣時豈不好嗜古業成癖羣飛任  
刺天甘剪籠中翮丈夫身計輕憂國愁如積向欲恢三  
京今日蹙五百西蜀斷咽喉北軍患肘腋流民滿京師  
戾氣成疾疫強寇恣咆哮行人飽需索廷紳倒手版淮  
帥羞中慚南海下蒲輪西人望衮舄病劇乏良醫棋危  
需善奕君行覲清光何策輸忠益急湏息邊塵徐可壽  
國脉任責屬諸賢臞儒山澤

寄惠州陳史君真卿

千仞羅浮山蓬萊分左股有詔陳太邱剖符為地主皇  
皇太邱門德星之所聚前光盛胚胎後來紛衆甫共惟  
休齋公遺教垂鄒魯君侯其聞孫風烈不忝祖繼以詩  
書帥遺愛比召杜君侯其英嗣真清亦如父嚮者位于  
朝穹官可拾取不能枉尺尋矧肯效媚媮翩然乞一麾  
來此開藩府此郡舊富饒廣中號樂土年來困軍湏炎  
火無冷釜鄰盜闖其藩燒痕未全補噓枯待仁風醒暘  
仰膏雨迎輅雨朱幡驩呼十萬戶朝宣上德意夕問民  
疾苦為渠作豐年愁嘆變歌舞得結數十輩萬物氣可  
吐行奏循良功入布承明武走也山林人本無素宦譜  
妄言宗社事屢犯君相怒緝緝惡樊繩耽耽畏闕虎歸  
歟結茆庵課僕理蔬圃餘子易炎涼眼前何足數君侯  
誼薄雲寄詩傾肺腑

還甌行

老屋數十椽下濕上又破無端野狐精昏夜人為盜竊  
我三重甌目之為奇貨持以獻朱門曰此堪媚竈自余



失此物志意不少挫苦節凌歲寒羞顏薄時好命義守  
大閑潛深仍仗與客從北方來特以吉語告舊物將見  
還前甌元不墮余笑與客言的有此說麼孔光坐廣堂  
當局已昏菴余嘗對天仗正色數渠過其心不能容未  
免含疾媚石顯在宮闈威福弄幽與余又疏擊之見面  
定渠唾其術方盛行及此必圖報客乃寬余心少安謹  
勿躁聖主赦宿憊仁恩等天憫昭相愛善類德量如海  
大讒者害莫成匪伊甌自到未幾符其言客喜相問勞  
勸客勿為喜我且為時悼米石三十千杭人死饑餓敵  
寨七百里淮人共斬剉窖雪飛無留融風扇炎燥潮汐  
來無時民廬陷泥滂旱魃肆陸梁妖禽輒鳴噪殞星光  
射人雨雹威尤暴地軸疑翻騰乾文訝顛倒昔余出硬  
語萬死敢一冒廷臣誚雲狂相國嫌愈傲不幸暮年間  
前言多踐蹈今居山澤中日向蒼穹禱一願雨暘時田  
疇足杭粳二願干戈休邊境息巡邏庶幾老餘生農圃  
得自課保此狂生名比方散人號不然瞻四方欲徃誰

前導雖粟焉得食况有甑可卧人品有高卑才氣分銳  
情嗟我甚低垂賴君起吾悞

述夢

午枕避塵囂夢乘銀潢槎好風吹衣袂墮我天之涯羣  
仙赴號召驂鳳來香車一見如故舊絲麟酌流霞或鞭  
石為羊或握棗如瓜中有汗漫生盤礴理丹砂誰言仙有  
道仙凡各有家悠悠御風還聚散如團紗繩床一欠伸  
茲遊真幻耶咄咄置勿論呼童煮新茶

辛未中元記夢夢與一僧談世事良久問答中  
有凡事如此汝曹勉之之語既而造一境如仙

家居厥明用夢中八字為偈末章反騷

一念稍分明天壤異仙凡諸相等歸妄天真要無龐凡  
物非我有秋毫不可貪只此為上乘其諸總虛談無字  
經可閱無言禪可參曰雲過前山明月映空潭

蘧蘧一夢中了了三生意法界如許寬此生亦特寄誰  
言玉局仙元本是法器不解自磨礪因人亦成事強顏



游人間聊作逢場戲山色溪聲中略得些滋味

石塔本無縫吐光萬丈餘不是風火扇又非喉管噓此  
光胡為來塔亦不知渠解作如是觀身心長自如塔身  
俱著實光心等是虛虛實歸一致無乘亦無除

鑿空談荒唐我正不為此故知又故為頗悟前生是憑  
誰照前因斯言特戲耳既是無古今如何分彼已須彌  
一點塵萬劫一彈指無失亦無憂無得亦無喜

禪悅既無門仙居在何所與渠無半面一見相爾汝霓  
裳製未成翩翩欲高舉身如一羽輕去天才尺許胡為  
造此境問之不吾語正緣崆峒中蕭然無物貯

世人欲不死焚香事大羅死後欲超生將身靠彌陀个  
裏不透徹仙佛如子何我素不持戒焉能斷腥臊獨有  
一寸珪明白不可磨學仙與學佛此事付兒曹

擣薺餐鐵杵此味知者鮮乘車入鼠穴聞者知其舛打  
鐵作門限鬼笑定不免點雪紅爐中達觀理甚顯當局  
自然迷正欠撥一轉上馬犇前程此著須自勉

盤中有止水歷歷見鬚眉能定乃能應人心固如斯至  
誠本如神聖賢不吾欺鳴鶴方在陰其子輒和之天未  
降時雨山川雲已知誰能舍我龜而觀爾朵頤

贈談星達士

列肆競談星謬者十八九達士何許人儔中推好手精  
步宿羅胸縱談鬼擘口技絕固招窮鶉衣不掩肘竭來  
訪矐翁意欲相擊扣翁命翁自知不問子休咎蒼生命  
甚危子亦知乎否魏闕妖狐翔吳江水獸吼馮夷肆陸

梁富媪難載負強寇噬邊州湖堧經踐蹂王師戰且弱  
鉞鈍甲兵朽流民滿江濱溝洫紛骸體京米貴於金十  
千可一斗暮夜光燭天彗星大於帚災眚此非常其敢  
飲以酒都人極皇皇如魚驚在筍國脉眇一絲病固有  
從受西山薨於前鶴山繼於後洪蔣與李徐俱作修文  
友吳卧漫塘翁廣哭菊坡叟天為國生賢福賢理宜厚  
何事數鉅公不為國耆耇周堪劉向亡老光握靈壽元  
城了翁去賊京得皓首賢者今餘幾其生皆不偶或入



在朝廷或出為牧守或未脫丹書或猶耕岩數煩子布  
星躔為余細分割孰可坐廟堂孰竟死田畝孰堅如松  
篁孰脆如蒲柳天如昨吾宋存者必長久狂生何能為  
自分安老醜無地堪植錐仰空長擊缶昂藏作丈夫諂  
倭羞妾婦寧可放熊經不出隨狗苟但願世道寧天宇  
息塵垢廷無愴壬人周召置左右邊無兒戲軍廉藺善  
攻取庶幾老餘生官職乎何有閒日教子書不教子學  
走

水口上舟呈同行傳月山裝

沂流上嵩江江闊流益峻時方良月初打頭惡風信老  
翁把柁立首叫尾必應大男前運篙風激水還噴小男  
上拽縴石行踏復奮後退輒丈尋前躋不尺寸偏仄一  
堵中危坐易慵因冷雨去復來前山邈難認江天暮漸  
低好風來一瞬帆飽去如飛兩程疑可併舉杯囑月山  
凡物有定分壯年登王官轉盼更五閏星沙羅閔艱日  
轂轉顛頓方頭忤時流失脚踏陷窈窕宦疾以馳笑我

拙而鈍如登今日舟易退難於進自知平生事百欠無  
一剝飢寒駢出山孤笑破羣悶獨有不自欺心可與天  
印人為固多端天定或能勝願如晚來風先逆後乃順  
得酒且酌斟升沉付天運有窮必有通無喜亦無愠

送林公似有之宰古田

余與林公侶生長南山南吾翁與乃翁宿望俱不凡或  
晚登黃甲祿不霑斗甌或因頓場屋補勞僅青衫執手  
授遺編尚友遷繼談家法無諂語妙理靜中參丁丑俱

一第苦盡稍回甘蹭蹬二十年今纔換頭街嚮來同登  
者青雲徧騰驂吾輩慣冰檠世好殊酸鹹君去宰壯縣  
栽花興方酣我乃賦歸與悔狂口宜緘棘蠅來營營關  
虎卧耽耽頽波從汨沒砥柱高巉巖

孤士脫選階如出百丈塹舉員必及格桂籍始一占宰  
邑非不榮吏塵豈宜厭平生學愛心小試乃可驗今時  
邑大夫不軫閭閻念非財不經營所欲湏屬餐粃第要  
高華買姬求美艷驕色肆頡頏嚴科行聚斂攫肉比饑



鷹噬膚如獍獫但規已豐腴皇恤民亡玷吁嗟饕餮徒  
信是搢紳忝中人易轉移習俗多薰染林君最高明白  
行無一欠俗然君不然白璧絕瑕玷狂生作此詩未病  
投鍼砭愛助極拳拳苦語忘其僭

寄林教授龜從

我生麋鹿羣巖穴性所樂寓城看病女蹤跡良蹉跎神  
明倘見憐醫藥湏課效便當歸舊廬誰愛入此閤炎暑  
甚茲炮矮屋如籠罩欠伸尺蠖形低垂木鷄貌清晨得

君書銜繫新州教慈恩叙同年轉盼夢一覺我於端平  
初逢山叻直瀑批鱗拂神龍編鬚犯關豹一斥褫三官  
連年絕廩稍我罪坐狂愚今受人繫敲君胡二十年無  
由極比較今又深入南正坐不能巧羣兒益紛拏疾足  
逞超趕我輩履羊腸所歷極确磽宦海走千帆好風縱  
篙棹我輩航一葦無緣出泥淖世道日以艱大厦摧棟  
橈邊塵日以紛衝梯設矢砲逆潮陸成淵苦旱水飛窖  
餓莩盈通途驕兒縱烈爆君視此何時有官如荷校猶

戒我韜藏前尤勿再做良玉不受焚直木不畏撓命當  
安窮通義當守忠孝以別誦吾詩君心獨無忤

跋林學士宋卿帖

林初第時與友人洪明昌帖云某叨忝後得鋪地  
錢千省孤寒出京人例厚贐之所存無幾但沒雙  
金閒費耳僕一日過姑丈林叔寶家睹此帖因嘆  
前輩高誼如此偶憶韓魏公生平輕財喜士凡數  
事國史不載而家傳載之遂成古詩以發潛德

朝為一旅人暮拾九品官趾高氣且浮反面視孤寒昔  
聞韓魏公義風塞人寰赤舄坐畫錦有客排其闕孤身  
無所賣乞公玉盃盤公笑授之去感涕雙汎瀾我始得  
此事謂可聳俗觀家傳書甚悉國史載不完今見學士  
帖爛然銀鈎蟠方其一第初半載游長安持書遺鄉明  
客費無虛閒近得奩中貲分壯貧士顏寧我食無魚不  
忍渠無餐寧我裾無華不忍渠衣單臭味何所愛敢言  
囊之慳猶愈輕薄兒一笑黃金拚我來閱遺書據案發



長嘆縱橫纜片紙突兀已萬間魏公為上相庇士易為  
懽林公初筮仕為此良獨難景仰前輩人高節騫雲山  
原下不可作清風何時還泚筆哦此詩寄名烏絲欄庶  
幾一見者可以激偷頑

反艷歌曲復三山林斗南

誰作艷歌曲律清語不塵雜之古樂府意態甚迫真謂  
余欠嫵媚宜為衆女嗔方憐長門閉漸喜湯沐新此曲  
豈不俊所擬非吾倫生為竒男子先辨許國身有手要

折檻不炙許史門有頭要叩墀不拜五侯塵昵昵兒女  
語煦煦婦人仁夕泣緣失寵朝欣為承恩此非奴事張  
定是妾效秦是為赤有臭何止黃不純因君詞婉美感  
我意酸辛正恐漆園女嗤點我輩人

送地栗與囊山應叟和尚

淤泥生蓮花不如生地栗蓮花只好看地栗却好喫看  
底只是虛喫底却是實虛實總不如般若波羅密





